

Bedichia' nze'ca' Jesucristo nú uquie'e San Marcos

**Chenu uzete' Juan Bautista bee bene
Stichia' Diose**

(Mt. 3:1-12; Lc. 3:1-9, 15-17; Jn. 1:19-28)

1 Singuie uquixie bedichia'
nze'ca' Jesucristo, Lli'ñi Diose.

²Hua'tu uhuañi tucu profeta enu
lee Isafas enu uquie'e lunú uni
Diose, nu uni Diose:

Xe'laa tucu benea cha rluti lulu,
para nú tsu tsiñialla bee
bene nú zucu' bee bene
stichia'lu.

³Lu tucu dañi achi elu la nucua'a
bee bene
yene' bee bene chi benequie' nú
nilla:

“Utsu tsiñahua archi'hua
xne nze'ta li'inu enu neca
Diose'ahua.

Utsana' archi'hua stulahua
para nú yucu archi'hua
stichia'nu.”

⁴Uza' bee bedichia' quie' chenu
ube'ta Juan urinzalla bee bene
unga nucua' lu tucu dañi achi elu la
nucua'a bee bene, nu unilla:

—Uche'ehua archi'hua lu stulahua
nu uzu'cu'hua nú rni Diose, para
nú ri'i Diose perdona li'ihua che
rinzahua.

⁵Chequie uchiu'u huaxi bee bene
lubee iliu Judea cuna bee bene
eyeche llene Jerusalén uriñabeei
lu Juan para nú yene'beeí nú rnilla.
Che uxucu'dulabeei stulabeei nu
urinza Juan li'ibeei re'cu Jordán.

⁶Xucu Juan necache' ichiatsu'
camello nu sinchiu nú riu'u
xla'culla necache' iti, nu elubacu
nú udaculla neca xe'chiu cuna lliña
dañi. ⁷Udixiule'ella lubee bene ze'e
nú unilla:

—La le'e nú nze'ta tucu bene
enu chiqui' nibiya' luquela li'á, ni'
nú hua lucunu la yala xne neca
equielánu lua. ⁸Li'á rrinza li'ihua
cuna inza, pero li'inu rinzanu
li'ihua cuna Espíritu Santo.

Chenu urinza Juan Bautista Jesuse

(Mt. 3:13-17; Lc. 3:21-22)

⁹Bee bichia ze'e uchiu'u Jesuse
eyeche Nazaret nú nchiucu' lu iliu
Galilea. Che uriñanu lu Juan nu
urinza Juan li'inu re'cu Jordán.

¹⁰Chenu uchiu'u Jesuse lu inza,
ulañi'nu nú uya'la liñibe nu nze'ta
laca Espíritu Santo equienú. Xi
neca tucu paloma. ¹¹Nu uyene
tucu chii enza liñibe nu uni chii
ze'e:

—Li'ilu necalu lli'ñia nu chiqui'
se'ca li'ilu nu ñia nzu arquia lulu.

Chenu uri'i beze'lu preu Jesuse

(Mt. 4:1-11; Lc. 4:1-13)

¹²Cheelá uri'i Espíritu Santo nú
nza Jesuse lu tucu dañi achi elu la
nucua'a bee bene. ¹³Ze'e uya'nanu
chui'a bichia si rula' elu nucua'a
bee nañi dañi, che uri'i beze'lu preu
li'inu para nú la zucu'nu nú rni
Diose. Pero né ri'i beze'lu ana lunu
cheelá uriña bee ángele' DiOSE lunu
nu uzibi' bee ángele ze'e lunu.

**Chenu uquixie Jesuse nú uzete'nu
bee bene**

(Mt. 4:12-17; Lc. 4:14-15)

¹⁴Chenu netse Juan ni'cu' uya
Jesuse lubee eyeche lu iliu Galilea,
nu udixiule'enu bedichia' nze'ca
lubee bene nú xa neca lunú rnibiya'
Diose. ¹⁵Singuie uninu lubee bene
ze'e:

—Uriñala bichia nú ucuaqui u'na
Diose hua'tu. La acaxea' nú enta
nú nibiya' DiOSE lu iliulabe quie'.
Enze'e utsana' arqui'hua stulahua
nu uchili arqui'hua bedichia' nze'ca'
Diose.

**Ubixia Jesuse tacu bee bene enu
rucu bee bela para nú aca beella bee
bene'nu**

(Mt. 4:18-22; Lc. 5:1-11)

¹⁶Chenu udete Jesuse ru'u inzatu'
Galilea ulañi'nu Simón cuna bichii
Andrés nú si'qui beei ixii nú rucu
bela lu inzatu' ze'e xne neca beei
enu rucu bela. ¹⁷Chequie uninu
lubeei:

—Utequiehua li'á para nú
zeteahua nú nihua lubee bene

para nú aca beei benea luhuare nú
rucuhua bee bela.

¹⁸Hora ze'e utsa'na beei ixii nú
rucu bela nu chu nzequie beei
li'inu che. ¹⁹Lle'natsia enza lu ze'e
ulañi' Jesuse Jacobo cuna Juan
neca beei lliana' tucu bene enu lee
Zebedeo. Nucua'a beei liñi barco'
beei rquiela' beei ixii nú rucu bela.
²⁰Nu ubixia Jesuse li'ibeei, che
utsa'na beei pa' beei cuna bee mozo'
beei liñi barco nu chu nzuebeei
cuna li'inu.

**Chenu uri'iyeca Jesuse tucu bene
enu seca ichia' benechiqui'**

(Lc. 4:31-37)

²¹Chenu uriña beella cuna Jesuse
eyeche Capernaum. Bichia nú
sulachi bee bene Israel, uyu'unu
liñi indu' beella nu uquixienu
uzete'nu bee bene ze'e. ²²Chiqui'
nzenu arqui' bee bene ze'e lunú
sete'nu xne sete'nu bee bene xi neca
tucu bene enu chiqui' rnibiya' nu
bee ulaxcuela enu reca ley' Moisés
la zete' beei scua. ²³Liñi indu
ze'e nzucu tucu niyu enu nchiñi
benechiqui' arqui', nu rixiali niyu
ze'e nú rni:

²⁴—¿Xinu rri'chialu li'iru Jesuse
bene eyeche Nazaret? ¿Uriñalu para
nú nitilulu li'iru la? Nu'lua li'ilu nú
necalu bene' DiOSE nu la lu'culu
dula.

²⁵Chequie uri'inu nú uqui'ya'
benechiqui' nu uninu:

—iUzaca nu uchiu'u arqui' niyu
quie'!

²⁶Che utsi'qui benechiqui' niyu
ze'e lu yuu, nu uri'i ichia ziñia lu
niyu ze'e. Nu chiqui' juerte rixalii
nu chu uchiu'i arqui' niyu ze'e. ²⁷Che

ye bee bene enu nucua'a ze'e uyanu
arqui'beeí nú unibeeí lu sa'beeí:

—¿Xi nucua'? Nú, inech'e sete'
nucua' lia'ahua chiqui' rnibiya'
nucua' hasta bee benechiqui' sucu'
nú rni nucua'!

²⁸Scua yexetsia uri'chia bedichia'
diqui lu iliu Galilea lunú uri'i Jesuse.

Uri'iyeca Jesuse suegra' Pedro

(Mt. 8:14-15; Lc. 4:38-39)

²⁹Chequie chenu uchiu'u beella
liñi indu ze'e. Nzenu Jesuse, Jacobo
cuna Juan ni' Simón cuna Andrés.
³⁰Ze'e nuxu suegra' Simón nu secalla
xlee. Chequie chenu uriña Jesuse
ze'e, udixiule'e beeí lunu nú ritilla.
³¹Chequie uyabicanu elu nuxulla nu
una'tsenu yalla nu uletsanu li'illa.
Hora ze'e uchiu'u xlee nú secalla.
Che udete'lla nú udacu beella.

Uri'iyeca Jesuse huaxi bee bene enu riti

(Mt. 8:16-17; Lc. 4:40-41)

³²Chenu uhuatse' bichia nu enta
chu'u rula'. Uquixie bee bene nú
uriñayu beeí ye bee bene enu
riti cuna bee bene enu nchiñi
benechiqui' arqui' lu Jesuse.
³³Uyetesa' ye bee bene eyeche ze'e
ru'u ni'i elu nzucunu. ³⁴Uri'iyeca
Jesuse bee bene enu riti ye luu
bee elichia nú seca beeí, cuna nú
uhuanu bee benechiqui' arqui' bee
bene. Pero né zelanu nú ani bee
benechiqui', xne nu'lu beeí li'inu.

Uzete' Jesuse Stichia' Diose lubee bene lu iliu Galilea

(Lc. 4:42-44)

³⁵Chenu lá ye'e lu yuu nu
necabesca' nzu uzetee Jesuse nu

uchiu'unu eyeche ze'e nu nzanu
tucu luhuare elu lecalí ti nu' para
nú nacu'nu lu Diose ze'e. ³⁶Chequie
uya Simón cuna beelá bee bene enu
neyete'i nu uyacua'na beeí Jesuse.
³⁷Chenu ullela' beeí li'inu, unibeeí
lunu:

—Huaxi bee bene rcua'na li'ilu.

³⁸Che uninu lubeeí:

—Cha'ahua lubee eyeche axu ca'a
para nú le'ca ixiule'a Stichia' Diose
lubee bene cua' xne enze'e uriña.

³⁹Che udixiule'enu Stichia' Diose
lubee bene liñi bee indu' bee bene
Israel diqui lu iliu Galilea. Nu
uhuanu benechiqui' arqui' bee bene.

Uri'iyeca Jesuse tucu bene enu ulle'ca elichia nú lee lepra

(Mt. 8:1-4; Lc. 5:12-16)

⁴⁰Tucu bichia uriña tucu niyu enu
seca elichia nú lee lepra lu Jesuse
nu utsu lliquii lunu nu uni:

—Tunu laca arqui'lu nu' beya' nú
ri'iyecalu li'á.

⁴¹Chequie chiqui' uhua'a arqui'
Jesuse niyu ze'e nu uricu'nu yanu
equiei nu uninu:

—Niarquia nú yeca'lu, uyeca' nee.

⁴²Chenu uninu scua, hora ze'e
uyeca'i elichia nú secái nu leca' xi
nai. ⁴³Che udu' nziunu li'i nu uninu
lui:

⁴⁴—Nia lulu nú la ixiule'elu nucua'
lu ni' tucu bee bene nú xa uyeca'lu.
Lu ule'yatsia uquiatiixiule'e nú
uyeca'la'lu. Che dete'lu tucu u'na lu
Diose tucu nú unibiya' Moisés, para
nú ri'i bee bene beya' nú uyeca'la'lu.

⁴⁵Pero chenu nzia niyu ze'e, né
tsacu' arqui'i. A'la mase udixiule'i
lu titse bee bene nú xa uri'iyeca
Jesuse li'i. Enze'e leca modo nú

achu'u Jesuse lu ni' tucu bee eyeche ze'e. Enze'e enzetsianu dañi elu leca' ni'i bee bene. Pero uyasca' huaxi bee bene bee eyeche diqui abenchila' ze'e elu nzucunu.

Chenu uri'iyeca Jesuse tucu bene enu neati cuerpo'

(Mt. 9:1-8; Lc. 5:17-26)

2 Xiucu xuna bichia lu ze'e, uyu'u zeca Jesuse eyeche Capernaum nu ungabiya' bee bene ze'e nú nzucunu tucu ni'i. ²Che yexetsia uyetesá' huaxi bee bene ru'u ni'i elu nzucunu ze'e, nu uchee liñi ni'i ze'e, ni' ru'u puerta la aca' riña beelá bee bene, nu udixiule'enu Stichia' Diose lubee bene ze'e. ³Ze'e uriñayuu tacu bene enu nuya' tucu niyu enu neati cuerpo'. ⁴Pero né ri'i beei ana nú a riña beei hasta lu Jesuse, xne nucua'a huaxi bee bene liñi ni'i ze'e. Enze'e uxa'lla beei equie ni'i ze'e, nu cuna camilla ulaca beei niyu enu riti ze'e hasta elu nzu Jesuse. ⁵Chenu ulañi' Jesuse nú nzeli arquí'beei li'ínu, che uninu lu niyu enu riti ze'e nu uninu:

—Niyu uri'á perdona stulalu nee.

⁶Pero ze'e nucua'a bee ulaxcuela enu reca ley' Moisés nu uri'i beei elliebacu' nú unibeei: ⁷“¿Ti neca nucua'? Nú rni nucua' tucu nú neca nucua' Diose. Xne tucutsia Diose rri'i perdona xtula bee bene.” ⁸Pero hora ze'e uri'i Jesuse beya' lunú rri'i beei elliebacu'. Enze'e uninu lubeei:

—¿Xinu uri'ihua elliebacu' scua?

⁹¿Ta nú mase neriña' nú aca nú nia lulla: “Uri'á perdona xtulalu”, urre nia lulla: “Uzetee, nu una'tse camiya'lu nu uquia'a”? ¹⁰Pero

nee lubea luhua nú li'á Bene enu uxe'la Diose rlu'cua nú rnibiya'a lu iliulabe, para nú ri'á perdona stula bee bene.

Uni Jesuse lu niyu enu riti ze'e:

¹¹—Nia lulu nú uzetee nu una'tse camiya'lu nu uquia'a ni'lu nee.

¹²Hora ze'e uyeca' niyu ze'e nu una'tsei camilla'i nu chu uchiu'i liñi ni'i ze'e. Ulañi' ye bee bene enu nucua'a ze'e nucua' nu unibeei bedichia' nze'ca lu Diose. Nu chiqui' uyanu arquí' ye bee benecua' lunú ulañi' beei nu unibeei.

—Lasca' lañia'hua ni' tucu bese lunú ulañia'hua nee.

Ubixia Jesuse tucu bene enu lee Leví

(Mt. 9:9-13; Lc. 5:27-32)

¹³Cheelá nza zeca Jesuse ru'u inzatu' Galilea. Ze'e uyetesá' huaxi bee bene lunu nu uzete'nu li'ibeei.

¹⁴Chenu udetenu ze'e, ulañi'nu Leví necai lliana' tucu bene enu lee Alfeo. Leví quie' nzucui elu rri'i cubre equie bee impuestos lubee bene nu uninu lui:

—Ute quie li'á.

Nu chu utsuli Leví nu nzai cuna li'ínu.

¹⁵Chenu nzucu Jesuse lu mexa liñi ni'i Leví, cuna bee bene'nu udacununu huaxi bee bene enu rri'i cubre equie bee impuestos cuna bee bene enu la nehuañi tucu nú rnibiya' ley' Moisés, xne nzequie huaxi bee bene cua' li'ínu. ¹⁶Chequie nucua'a chiucu chuna ulaxcuela enu reca ley' Moisés cuna bee fariseo enu ulañi' nú racunuu Jesuse bee benecua'. Che unibeei lubee bene'nu:

—¿Xinu racunuu maestro'hua cuna bee bene enu rri'i cubre equie

bee impuesto? ¿Cuna bee bene enu la nehuañi tucu nú rnibiya' ley' Moisés?

¹⁷Chenu ubene' Jesuse nucua', uninu lubee bene cua':

—Bee bene enu la aca riti, la zecala'cha' bee nze'e tucu doctor. Pero bee bene enu riti, rqui'ña bee nze'e tucu doctor. Enze'e nzela nee, para nú bixia bee bene nú che'e arqui'bee' lu dula nú rlu'cu beei. Lá yela lubee bene enu rri'i elliebacu' nú la lu'cu dula.

Udixiule'e Jesuse xa neca equie cuenda' chenu la acu bee bene lunú rlu'cu beei ula'na lu Diose

(Mt. 9:14-17; Lc. 5:33-39)

¹⁸Tucu bichia udete' bee bene' Juan Bautista cuna bee fariseo bichia nú né acu beella equie nú rlu'cu beella ula'na lu Diose, nu uriña chiucu chuna bee bene lu Jesuse nu unibeei lunu:

—Udete' bee bene' Juan cuna bee fariseo bichia nú né acu beella equie nú rlu'cu beella ula'na lu Diose. ¿Xiquie nú la ri'i bee bene'lu scua?

¹⁹Chequie ucuaqui Jesuse lubee bene ze'e nú uninu:

—¿Xie' la acu bee bene enu nezene' lu tucu tsa'a chenu xia tucu bene chenu nzucusca' bene enu xia ze'e la? Lunú nzusca' bene enu xia ze'e. Enze'e rqui'ña nú acu bee bene ze'e. ²⁰Pero riña bichia chenu la nzua' bene enu xia cuna bee bene. Che si dete' beella bichia nú la acu beella equie nú rlu'cu beella ula'na lu Diose.

²¹'Lecati quiela' tucu laquie uxu cuna tele'e laquie cuqui xne chenu

uxu' laquie cuqui ri'i nú tsaa laquie uxu. ²²Le'ca la chu'u biñu cuqui liñi iti uxu xne ri'i biñu cuqui cua' nú tsaa iti uxu, che nitilu biñu cua' la cuna iti uxu. Enze'e rqui'ña nú chu'u biñu cuqui liñi iti cuqui.

Unguxi bee bene' Jesuse tuu lu trigo bichia nú sulachi bee bene Israel

(Mt. 12:1-8; Lc. 6:1-5)

²³Tucu bichia nú sulachi bee bene, udetenu Jesuse bee bene'nu lu yuu elu nu' trigo nu uquixie bee bene'nu unguxi beella tuu lu trigo. ²⁴Chequie unibee fariseo lu Jesuse: —Bi'yacuru, ¿xiquie nú rri'i bee bene'lu lunú la yala ri'i beella bichia nú sulachi bee bene?

²⁵Pero uni Jesuse lubeei:

—¿Xie' lasca' ulahua elu rni nú xa uri'i David cuna bee bene enu nuulla tucu bese chenu ulia'na' beella la? ²⁶Tiembu nú unga Abiatar ule'ya, enu rnibiya' lubee ule'ya uyu'u David liñi indu' Diose nu udaculla pá nú necale'ya lu Diose. Añinzuca nú ule'yatsia nu' modo nú acu pá cua'. Pero udete'lla pácu'a' udacu bee bene enu nuulla.

²⁷'Ureche' Diose bichia nú sulachi bee bene, pero lá reche'enu bichia cua' para nú nehuana zeca bee bene bichia cua'.

²⁸'Li'á Bene enu uxe'lla Diose le'ca rlu'cua nú rnibiya'a lu bichia nú sulachi bee bene.

Uri'iyeca Jesuse tucu bene enu ubichicu' ya

(Mt. 12:9-14; Lc. 6:6-11)

3 Stucu bese chenu uyu'u Jesuse liñi tucu indu' bee bene Israel. Ze'e nzucu tucu niyu enu ubichicu'

tucu chú ya. ²Chequie bee bene enu nucua'a ze'e. Nucua'a tsi'ña beei tunu ri'iyeca Jesuse niyu ze'e bichia nú sulachi beei, para nú scua xana bitsi beei lu cuenda'nu. ³Che uni Jesuse lu niyu enu ubichicu' ya ze'e, nu uninu:

—Utsuli lubee bene cua' nee.

⁴Nu uninu lubee bene ze'e:

—¿Xi riala ri'i bee bene bichia nú sulachi bee bene? ¿Nú neca nze'ca la urre nú necha neca la? ¿Tsila'a bene nú la ati tucu bene la, urre tsana' arquí' bene nú ati tucu bene la?

Pero lecaxi ucuaqui bee bene ze'e.

⁵Chequie ubi'yanu lubee bene ze'e nu chiquí' uleenu cuna nú chiquí' nehuana utsu arquí'nu xne la hua'a arquí'beei bee bene, nu uninu lu niyu enu ubichicu' ya ze'e:

—Ulí yalu nee.

Nu chu ulí niyu ze'e yai nu hora ze'e uyeca' yai. ⁶Pero chenu uchiu'u bee fariseo ze'e, uyete sa' beei cuna bee bene' Herodes nu uri'i beei elliebacu' xneca ri'i beei para nú uti beei Jesuse.

Chenu nucua'a huaxi bee bene ru'u inzatu' Galilea

⁷Chequie chu nza Jesuse cuna bee bene'nu ru'u inzatu' Galilea, nu nzequie huaxi bee bene li'inu, bee bene Galilea cuna bee bene Judea, ⁸cuna bee bene Jerusalén, cuna bee bene Idumea, cuna bee bene enu nucua'a stucu chú re'cu Jordán, cuna bee bene enu nucua'a lu iliu Tiro, cuna bee bene enu nucua'a lu iliu Sidón, uya huaxi bee benequie' lunu, xne unga biya'beei nú rri'inu bee milagro nú chiquí' neca equie.

⁹Enze'e uninu lubee bene'nu, nú tsu tsiña beella tucu barco para nú chu'unu liñi barco ze'e, para nú la ta'cu bee bene li'inu. ¹⁰Xne uri'iyecanu huaxi bee bene. Enze'e ye bee bene enu riti uricuya beei lunu, para nú ti' beei ya beei li'inu.

¹¹Chequie bee bene enu nchiñi benechiquí' arquí' chenu ulañi' beei Jesuse, utsulliqui beei lunu nu urixialibeei nú unibeei:

—iNecalu Lli'ñi Diose!

¹²Pero unibiya' Jesuse lubee benechiquí' nú la ixiule'e beei nú ti necanu lubee bene.

Chenu ucañi Jesuse chi'chiucu bee apóstol'nu

(Mt. 10:1-4; Lc. 6:12-16)

¹³Cheelá uquie Jesuse equie tucu dañi, nu ubixianu bee bene enu niarquí'nu nú cha cuna li'inu nu uyabica bee benequie' lunu.

¹⁴Che ucañinu leta bee bene ze'e, chi'chiucu bene para nú chenu bee benequie' li'inu, cuna nú xe'lanu li'ibeella para nú chetixiule'e beella Stichia' Diose lubee bene.

¹⁵Udete'nu nú rnibiya'nu lubeella para nú ri'iyeca beella bee bene enu riti cuna nú lua beella benechiquí' arquí' bee bene. ¹⁶Bee ningiue' neca chi'chiucu bee bene enu ucañi Jesuse tuculla lee

Simón enu le'ca uhualenu,

Pedro.

¹⁷Stuculla lee Jacobo, nu stuculla lee Juan, neca rucu benequie' lliana' bene enu lee Zebedeo.

Uhuaalee Jesuse rucu lliana' Zebedeo, Boanerges, nu rni nucua' bee lli'ñi beziyu'.

- ¹⁸ Le'ca ucañi Jesuse Andrés,
Felipe,
Bartolomé,
Mateo,
Tomás,
Tadeo,
Simón, enu ulletse leta tucu
partido nú lee cananista,
¹⁹ cuna Judas Iscariote enu udete'
cuenda Jesuse.

**Uni bee bene nú ulu'cu Jesuse lunú
rnibiya' beze'lu**

(Mt. 12:22-32; Lc. 11:14-23; 12:10)

²⁰ Chenu ulaxu nú ucañinu
chi'chiucu bee benecua' uriñayunu
li'ibeella ru'u tucu ni'i, ru'u ni'i
ze'e stucua'la bese uyetesa' huaxi
bee bene lubeella. Hasta nú né
llu'cha'nu acununu cuna bee
bene'nu. ²¹ Chenu ungabiya' bee
sa'a Jesuse nú reca ze'e. Nzetucu
beella li'inu leta bee bene ze'e, xne
rni bee bene nú secanu ichia loco.

²² Pero bee ulaxcuela enu reca ley'
Moisés, nze'ta beei enza Jerusalén
nu unibeei lusa'beei:

—Benequie' rlua benechiqui'
arqui' bee bene cuna poder nú
rlu'cu beze'lu enu rnibiya' lubee
benechiqui'.

²³ Che ubixia Jesuse li'ibeei nu
uninu lubeei:

—¿Xa modo nú hua beze'lu le'ca
sa' bee beze'lu? ²⁴ Tucu ubiernu
enu rle'e sa'a siempre rliunu sa'a
beei nu tunu rliunu sa'beei, laxu nú
rnibiya' ubiernu quie' che. ²⁵ Le'ca
esquie bee bene tucu ni'i tunu liunu
sa'a beella laxu bee bene quie' che.
²⁶ Le'ca esquie tunu tiliaca' beze'lu
le'ca sa' beze'lu ulaxu nú rnibiya'
beze'lu che.

²⁷ Nu lecati aca chu'u ni' tucu
bene enu naaqui para nú cachi' beei
stene'lla, tunu la llica'cuxu beei
li'illa. Scua si ri'i beei ana nú cachi'
beei stene'lla che.

²⁸ Ixiule'a luhua nú ye bee dula
nú rri'i bee bene, nu' perdona' bee
dula cua'. Le'ca nu' perdona' ye bee
bedichia' chi'qui' nú rni bee bene.
²⁹ Pero tatse bee bene enu nichi'qui'
lu Espíritu Santo, leca' perdona
para bee benecua'. Nzuquietsia beei
castiya' beei nú leca xunga laxu.

³⁰ Uni Jesuse scua xne unibeei nú
nchiñi benechiqui' arqui'nu.

**Chenu uni Jesuse nú ti neca na'nu
cuna bichinu cuna zananu**

(Mt. 12:46-50; Lc. 8:19-21)

³¹ Hora ze'e uriña na' Jesuse,
cuna bee bichinu elu nzunu. Pero
uya'natsia beella eli'ya' nu uni
beella lubee bene enu nucua'a ze'e
nú nibeei lu Jesuse para nú ye'tanu
rixia beella. ³² Nu unibeei bene enu
nucua'a abenchila' lunu:

—Nzu na'lu cuna bee bichilu eli'ya'
rla'na beella li'ilu.

³³ Pero uninu lubeei:

—¿Ti neca naa nu ti neca bee
bichia?

³⁴ Chequie ubi'yanu lubee bene enu
nucua'a diqui abenchila'nu nu uninu:

—Ca'a nucua'a bee bichia cuna
naa. ³⁵ Puese tatse bene enu sucu'
lunú riu' arqui' Diose, neca bene
ze'e bichia cuna zanaa cuna naa.

**Chenu uni Jesuse ejemplu' tucu bene
enu nzetu' nii**

(Mt. 13:1-9; Lc. 8:4-8)

4

Stucu bese uquixie Jesuse
sete'nu bee bene ru'u inzatu'

Galilea. Lunú uyetesa' huaxi bee bene lunu, enze'e uyu'unu liñi tucu barco nú nzu lu inzatu' ze'e, nu chu uzucunu liñii, diqui nú nucua'a ye bee bene ru'u inzatu' ze'e. ²Che uzete'nu huaxi bee ejemplu lubee bene ze'e. Chenu uzete'nu bee bene uninu lubeei:

³—Uquie'e diacahua ninguie'.

Tucu bichia uchiu'u tucu niyu nzetu' nii lu yu'lla. ⁴Chenu rdu' niyu quie' nii uzana' lle'na ebichi lu inziu nu chu ulaca bee iñi udacue. ⁵Lle'na ebichi uzana' leta quiee, elu leca huaxi yuu. Enze'e yexetsia uliñi ebichi quie' xne leca huaxi yuu ze'e. ⁶Pero chenu unga nelee uri'i be' bichia nú ungu'lune. Lunú la aca aquíe nzene lue enze'e ubichii. ⁷Lle'na ebichi uzana' leta aca eche, chenu uru'cu aca eche. Nézela aca eche cua' nú aru'cue enze'e né ayue. ⁸Pero ebichi nú uzana' lu yuu nze'ca, uru'cu nze'cae nu chiqui' ñia unguyu'e. Texcua'a bee ebichi cua' unguyu' ala llich'i ebichi nu texcua'e unguyu' sesenta ebichi nu texcua'e unguyu' tucu ayu'u ebichi.

⁹Le'ca uni Jesuse lubee bene ze'e: —Tatse bene enu niarqui' nú yene' nú rnia quie'e diaca nze'e che.

Udixiule'e Jesuse xinu uninu bee ejemplu

(Mt. 13:10-17; Lc. 8:9-10)

¹⁰Chequie chenu uya' nasca lle'na bee bene cuna Jesuse cuna chi'chiucu bee bene'nu, unidichia' beei lunu:

—Xa rni bee ejemplu nú uninu.

¹¹Che ucuaquinu nu uninu lubeei: —Li'ihua uliqui' Diose nú ri'ihua beya' xa neca nu rnibiya'nu lunú

lasca' ri'ihua beya'. Pero bee bene enu la chili arqui' Diose, setea li'ibeei puro tsia ejemplu. ¹²Xne mase ri'ya beei, nu mase riene' beei. Pero leca xunga ri'i beei beya'. Scua la benchila' arqui'beei lu Diose, nu la ri'inu perdona stula beei che.

Udixiule'e Jesuse nú xneca neca ejemplu nú uninu

(Mt. 13:18-23; Lc. 8:11-15)

¹³Le'ca uni Jesuse lubeei:

—¿Xie' la ri'ihua beya' xa neca lunú rnia scua la? ¿Xa ri'ihua beya' beela bedichia' nú niilá luhua che? ¹⁴Bene enu udu'u nii neca xi neca tucu bene enu rixiule'e Stichia' Diose lubee bene, ¹⁵nu nu' bee bene enu riene' Stichia' Diose, pero la zela beze'lu nú chenala beei Stichia' Diose. Neca bee bene quie' xi neca ebichi nú uzana' ru'u inziu. ¹⁶Texcua'a bee bene neca xi neca ebichi nú uzana' leta quiee. Riene' beei Stichia' Diose nu ñia uyucu arqui'beei. ¹⁷Pero li'ibeei neca beei xi neca ebichi nú leca huaxi luu. Chequie chenu si'i beei lunú seca beei, urre chenu se'ta bee bene li'ibeei sana' arqui'beei Stichia' Diose. ¹⁸Texcua'a bee bene neca xi neca ebichi nú uzana' leta aca eche, riene' beei Stichia' Diose. ¹⁹Pero máse nzenu arqui'beei lunú nu' lu iliulabe. Sequienu beei le'catsia li'ibeei, xne niarqui' beei nú lu'cu beei yeene. Chequie chenu nchiñi ye bee nucua' elliebacu' beei, sana' arqui' beei nú riene' beei Stichia' Diose. Lecaxi zibi' nú ubene' beei Stichia' Diose che. ²⁰Pero nu' bee bene enu riene' Stichia' Diose, cuna nú sucu' beei nú rnii, li'ibeei neca

beei xi neca ebichi nú uzana' lu yuu nze'ca. Texcua'a beei chenu rixiule'e beei Stichia' Diose lubee bene rri'i beei ana huaxi bee bene. Neca beei xi neca ebichi nú unguyu' ala llich'i ebichi urre xi neca ebichi nú unguyu' sesenta ebichi urre xi neca ebichi nú unguyu' tucu ayu'u ebichi.

Chenu udixiule'e Jesuse ejemplu' quinqué

(Lc. 8:16-18)

²¹Le'ca uni Jesuse lubeei:

—¿Leca modo nú du' llie'e tucu quinqué, tunu tsacu' bene tucu caja equiee, urre tsu benene liñi luna? Rqui'ña, nú zucu quinqué cua' elu ayaa, para nú du' llie'e diqui luhua. ²²Le'ca scua, ni' tucu beenú a'chi neca la ya'na nucua' scuatsia riña nú aca che ye bee nucua', nu ni' tucu beenú a'chi' neca la ya'na nucua' scuatsia riña nú acabiya' ye bee nucua'. ²³Tatse bee bene enu niarqui' nú yene' nú rnia quie'e diaca nze'e che.

²⁴Le'ca uni Jesuse lubeei:

—Uri'ihua elliebacu' equie bee bedichia' nú riene'hua. Xne tunu rri'ihua caso Stichia' Diose. Le'ca liqui'nu nú maselá ri'ihua beya' stichia'nu. ²⁵Xne bee bene enu rri'i beya' Stichia' Diose riña nú maselá ri'i nze'e beya' stichia'nu pero bee bene enu lle'natsia rri'i beya' Stichia' Diose, cuna nu la ri'i caso beei stichia'nu. Hasta lunú uri'i beei beya' lle'na niti nucua' arqui'beei.

Uni Jesuse tucu ejemplu' nú xa enta ru'cu tucu ebichi

²⁶Le'ca uni Jesuse lubeei:

—Elurnibiya' Diose, neca xi neca nú secaa tucu bene chenu nze tu'lla nii lu yu'ulla. ²⁷Xne mase ra'tse bene quie' rula' nu bichia rri'lla riña'. Bichia si rula' rliñi ebichi cuna nú enta ru'cue, pero la ri'lla beya' xa enta ru'cue. ²⁸Xne li'i yuu ze'e rri'i nu enta ru'cu ebichi, rluti rliñi nu recae huañi, cheelá enta tuu lue nu cheelá rayue. ²⁹Nu chenu necane ula'cu, che xiecu' bee benene xne necala tiambu nú yete' sa'e.

Uni Jesuse tucu ejemplu' ebichi' mestaza

(Mt. 13:31-32; Lc. 13:18-19)

³⁰Le'ca uni Jesuse lubeei:

—¿Xa nia luhua para nú ri'ihua beya' xa neca lunú rnibiya' Diose? ¿Nu xi lubea luhua para nú ri'i nze'cahua beya' xa necane?

³¹Ixiule'a luhua xa neca nú rnibiya' Diose. Necane xi neca ebichi' mestaza. Ebichi quie' chenu riu'e lu yuu, me'elae lu ye bee ebichi nú nu' lu iliulabe. ³²Pero chenu uyu'u niila ebichi cua', chequie enta ru'cue nu máse rru'cue lu ye bee huañi hasta bee iñi nu' modo nú rreche'e beei exlia'tse' beei lu ellutsa lue cuna nú sulachi beei lu xca'la'e.

Xinu uzete' Jesuse puro bee ejemplu'

(Mt. 13:34-35)

³³Scua uzete' Jesuse Stichia' Diose lubee bene. Uninu huaxi bee ejemplu, hasta lunú uri'itsia beei beya'. ³⁴Siempre uninu bee ejemplu chenu uzete'nu bee bene. Pero chenu nzu li'itsianu cuna bee bene'nu udixiule'enu lubeella xa neca lunú uninu lubee bene scua.

Uzucu' bii cuna inzatu' nú uni Jesuse

(Mt. 8:23-27; Lc. 8:22-25)

³⁵Le'ca bichia ze'e chenu uyu'u rula' uni Jesuse lubee bene'nu nu uninu:

—Cha'ahua stucu chu inzatu'quie'.

³⁶Che utsa'na bee bene'nu bee bene ze'e nu uyu'u beella liñi barco cuna Jesuse. Le'ca nza texcua'a bee barco cuna li'ibeella. ³⁷Chequie unga tucu bii fuerte lu inzatu' nu utsuli lu inza ze'e nu uquixie uyu'e hasta liñi barco' beella. ³⁸Pero ra'tse Jesuse nuxunu enza rqui' barco ze'e nu necu'cunu tucu almohada. Che ucua'ñi beella li'inu nu uni beella lunu:

—iMaestro! ¿Xinu la ri'i casolo lunú se'ca'ahua nzee chatse'ahua lu inza?

³⁹Chequie uzetee Jesuse nu utsuxenu bii, nu uninu lu inzatu' ze'e:

—iAca xee!

Nu chu unga xee bii cuna inzatu' ze'e. ⁴⁰Cheelá uninu lubee bene'nu:

—¿Xinu chiqui' xiquihua? ¿Xie'lasca' chili arquí'hua li'á la?

⁴¹Pero chiqui' ulliqui beella nu unidichia' beella lusa' beella:

—¿Ti neca niyu quie' nú hasta bii cuna inzatu' sucu' nú rni nucua'?

Chenu uhua Jesuse benechiqui' arquí' tucu bene eyeche nú lee Gadara

(Mt. 8:28-34; Lc. 8:26-39)

5 Chenu uriña beella stucu ch́ inzatu' ze'e, lu yu'u bee bene eyeche Gadara. ²Hora nú uchiu'u Jesuse liñi barco ze'e uyacha'calu tucu niyu enu nchiñi benechiqui'

arquí' li'inu, uchiu'u niyu quie' liñi pantiuñi. ³Xne siempre nehuañi niyuquie' leta bee eluhua' bee bene nguti. Nu lecati ri'i ana lui, mase nú ullica'cuu bee bene li'i cuna cadena. ⁴Huaxi bese ullica'cuu bee bene cadena yai cuna cuchiu'i, pero chu uchiecu'i cadena nu unga pedasue, nu lecati ri'i ana lui. ⁵Bichia si rula' enzei leta bee eluhua' bee bene nguti cuna liñi dañi, rixialii nu uchiecu'i li'i cuna quiee. ⁶Pero chenu ulañi'i Jesuse, nú entanu istusca' chequie xexu'i nze cha'calui li'inu, nu chu utsulliquii lunu. ⁷Che fuerte urixialii nu uni:

—¿Xinu riu'ulu cuna li'á Jesuse lliñi Diose liñibe? Ziquia lulu nú la du'lu nú nehua zecaa.

⁸Uni niyucua' scua, xne rnila Jesuse nú rninu:

—iBenechiqui' uchiu'u arquí' niyu cua'!

⁹Chequie unidichia' Jesuse lu niyu ze'e nú uninu:

—¿Ti leelu?

Che ucuaqui niyu ze'e:

—Li'á lea Legión xne huaxi necaru.

¹⁰Chiqui' uziquiee niyu ze'e lu Jesuse, para nú la xe'lanu bee benechiqui' ze'e enza istu luhuare ze'e. ¹¹Axu dañi ze'e nucua'a huaxi bee cuchi enu racu bee huañi. ¹²Chequie uziquiee bee benechiqui' ze'e lu Jesuse nú unibeei, uzela nú chu'uru arquí' bee cuchi cua'. ¹³Che uzela Jesuse nú uchiu'u bee benechiqui' arquí' niyu ze'e, nu uyu'u beei arquí' bee cuchi. Neca bee cuchi quie' tucu chiucu mili beel. Nu uyecaxu'u beel nu utsundiqui beel ru'u quiee laa nu uzana' beel hasta lu inza nu chu unguti beel lu inza ze'e.

¹⁴Hora ze'e uyecaxu'u bee bene enu rriucu bee cuchi ze'e nzetixiule'e beei lubee bene eyeche ze'e cuna lu ye bee bene enza ze'e lunú unga. Che uyabi'ya huaxi bee bene lunú unga ze'e. ¹⁵Chenu uriña bee bene ze'e elu nzu Jesuse, ulañi' beei nú uyeca'la' niyu enu ulletse benechiqui' arqui' cuna nú nutulai xucui nzucui ze'e. Nu chiqui' ulliqui bee bene ze'e. ¹⁶Che bee bene enu ulañi' nú xa unga lu niyu enu ulletse benechiqui' arqui' cuna nú xa unga lubee cuchi, udixiule'e beei nucua' lu beelá bee bene. ¹⁷Chequie uquixie beei nú uziquiree beei lu Jesuse para nú chiu'unu lu iliu'beei.

¹⁸Chenu nze chu'u Jesuse liñi barco uyabica niyu enu ulletse benechiqui' arqui' lunu, nu uziquiree lunu para nú chenunu li'i. ¹⁹Pero né zela Jesuse nú chenunu niyu ze'e nu uninu lui:

—Uya'a ni'ilu para nú zucunulu bee bene'lu, nu ixiule'elu lubeei lu ye nú uri'i Diose cuna li'ilu, nu cuna nú uhua'a arqui'nu li'ilu.

²⁰Chequie chu nza niyu ze'e, nu uquixiei udixiule'i lubee bene lu iliu Decápolis, lu ye nú uri'i Jesuse lui. Che ye bee bene ze'e uyanu arqui' lu cuenda' nucua'.

Uri'iyeca Jesuse tucu una'a cuna endu' bene enu lee Jairo

(Mt. 9:18-26; Lc. 8:40-56)

²¹Chenu uriña zeca Jesuse stucu chu inzatu' ze'e liñi barco, uyetesa' huaxi bee bene lunu ze'e. Che uya'nanu ru'u inzatu' ze'e.

²²Chequie uriña tucu bene enu rnibiya' liñi indu' bee bene Israel lunu, leella Jairo. Chenu ulañi'lla

Jesuse utsu lliquilla lunu. ²³Nu chiqui' uziquireeella lunu nú unilla lunu:

—Mero ati endua chaa nee ricu'lu yalu equie endua para nú yeca'nchu nu la atinchu.

²⁴Che nzeno Jesuse li'illa enza ni'lla nu nzequiee huaxi bee bene li'inu hasta nú uta'cu bee bene li'inu ze'e. ²⁵Leta bee bene ze'e nza tucu una'a enu riti, ungala chi'chiucu lana nú rlaca rene li'inchu. ²⁶Chiqui' nehuana ulle'ca una'a quie' nu uyanchu lu huaxi bee doctor, hasta nú ula'xunchu ye bee stene'nchu ungüitinchu. Pero né aca bee doctor a ri'iyeca li'inchu, a'la mase rri'i elichia'nchu. ²⁷Enze'e chenu ubene' una'a quie' lu cuenda' Jesuse, che uyabicanchu di'chinu leta bee bene nu uti'nchu yanchu tsu' xucunu.

²⁸Xne uri'inchu elliebacu': "Tunu ti'yaa tsu' xucunu, scua yecaa uri'inchu elliebacu'." ²⁹Hora ze'e utsuxee nú rlaca rene li'inchu nu utsi'nchu nú uyeca'la'nchu. ³⁰Che uri'i Jesuse beya' nú uriyecanu tucu bene cuna poder'nu, nu ubelletanu ubi'yanu lubee bene ze'e nu uninu: —¿Ti uti' yaa tetsu' xucua?

³¹Nu uni bee bene' Jesuse lunu:

—Nediya'lu nú nucua'a huaxi bee bene ca'a rta'cu li'ilu: ¿Xinu rndichia'lu nú tii uti' yaa tsu' xuculu?

³²Pero ri'yasca' Jesuse diqui abenchila'nu para nú lañi'nu tii uti'yaa tsu' xucunu. ³³Chequie chiqui' reca tse'tse una'a ze'e nú xiquinchu xne nediya'nchu lunú uri'inchu, nu uyabicanchu lu Jesuse, che chu utsu lliquinchu lunu, nu uninchu ye nú ulle'canchu lunu.

³⁴Che uni Jesuse lunchu:

—Endua lunú uchili arquí'lu li'á enze'e uyeca'lu, uquia'a nu la lliquilu uyeca'li'lu elichia nú ulle'calu nee.

³⁵Rniscá'la Jesuse lu una'a ze'e chenu uriña bee bene enu nucua'a ni'i Jairo nu unibeei lu Jairo:

—Unguutíla endu'lu nee. La nia'lu lu maestro.

³⁶Pero chenu ubene' Jesuse lunú uni bee bene ze'e. Che uninu lu Jairo:

—La lliquilu uchilitsia arquí' li'á.

³⁷Pero né zela Jesuse a chaa bee bene ze'e cuna li'ínu ni' Jairo. Nzenutsianu Pedro, cuna Jacobo cuna Juan bichi Jacobo. ³⁸Chenu uriña beella ni'i Jairo, ulañi' Jesuse nú nixi bee bene nu rixiali bee cuna nú runa' beei. ³⁹Chequie uyu'u Jesuse liñi ni'i Jairo nu uninu lubee bene ze'e:

—¿Xinu nixihua cuna nú runa'hua? Né ati endu' quie' ratse tsianchu.

⁴⁰Pero ulli'chinuu bee bene ze'e li'ínu, nu unibiya'nu nú chiu'u ye bee bene ze'e eli'ya', nu uyu'u nutsianu pa' endu' ze'e cuna na'nchu cuna bee bene'nu elu nchiucu'nchu. ⁴¹Che una'tse Jesuse ya endu' ze'e, nu uninu lunchu:

—Talita, cumi —rni bedichia' quie': Endu', nia lulu nú, uzetee nee.

⁴²Hora ze'e uzetee endu' ze'e nu utseenchu, nza endu' quie' chi'chiucu lana, che chiqui' uyanu arquí' yebec bene ze'e nucua'. ⁴³Pero unibiya' Jesuse nú la ixiule'e beella lu ni' tucu bee bene nú ungae scua. Le'ca unibiya'nu nú dete' beella nú acu endu' cua'.

Chenu ubenchila' Jesuse eyeche Nazaret

(Mt. 13:53-58; Lc. 4:16-30)

6 Chequie uchiu'u Jesuse ze'e, nu ubenchila'nu lachinu cuna

bee bene'nu. ²Chenu uriña bichia nú sulachi bee bene uquixie Jesuse nú sete'nu bee bene liñi indu' bee bene Israel, che ye bee bene enu riene' nú rninu, chiqui' uyanu arquí'beei nu unibeei lu sa'beei:

—¿Cá unga nucua' huaxi nú sete' nucua' scua? ¿Nu cá uhua nucua' nú reca elliebacu' nucua' scua cuna bee milagro nú rri'i nucua'? ³¿La nu nucua' neca enu rri'i riña' ru'u bangu nu neca nucua' lliana' María, nu neca bichi nucua' Jacobo, cuna José, cuna Judas cuna Simón la? ¿Le'ca esquie nucua'a bee zana nucua' eyeche quie'?

Enze'e lá chili arquí'beei li'ínu.

⁴Che uninu lubee bene ze'e:

—Catse rlu'cu bee bene ula'na lu tucu profeta. Pero la lu'cu bee bene lachilla ula'na lulla, cuna bee bene ni'illa cuna bee sa'lla.

⁵Enze'e né aca a ri'ínu huaxi milagro lachinu uricu'tsianu yanu equie chiucu chuna bee bene enu riti nu uri'iyecanu bee bene ze'e.

⁶Chiqui' uyanu arquí' Jesuse, nú né chili arquí' bee bene lachinu li'ínu.

Che chu uyanu bee eyeche axu ze'e nu uzete'nu bee bene ze'e.

Uxe'la Jesuse chi'chiucu bee bene'nu nze tixiule'e xa neca nú rnibiya' Diose

(Mt. 10:5-15; Lc. 9:1-6)

⁷Chequie ubixia Jesuse chi'chiucu bee bene'nu, nu uxe'lanu chiucua chiucua beella. Nu udete'nu poder lubeella para nú aca beella hua beella bee benechiqui' arquí' bee bene. ⁸Che unibiya'nu nú lecaxi uya' beella para lu inziu, la uya' beella biti nu la uya' beella pá nú

acu beella nu la uya' beella dimi, uya'tsia beella tucutsia xca beella. ⁹Cuna lucutsia beella nú niquie'e beella nu cuna xucu beella nú nutu tsia beella. ¹⁰Le'ca uni Jesuse lubeella:

—Chenu riñahua ni'i tucu bene uya'natsiahua ni'i bene ze'e hasta nú chiu'uhua eyeche ze'e. ¹¹Tunu tucu eyeche la yucu arquí' bee bene li'ihua cuna nú la niarquí'bee yene' beeí nú rñihua, uchiu'uhua eyeche ze'e nu ri'quihua yuu be'cha' nú nu' cuchiu'hua, xi neca tucu seña nú lá zucu'beeí nú unihua. Ixiule'a luhua nú bichia chenu dete' bee bene cuenda lu Diose másela dete' Diose castiya lubee bene cua' lunú dete'nue lubee bene eyeche Sodoma cuna Gomorra.

¹²Che chu nzue bee bene'nu nu nzetixiule'e beella lubee bene nú che'e arquí' bee bene lu cuenda' stulabeei.

¹³Le'ca uhua beella huaxi bee benechiquí' arquí' bee bene cuna nú udu' beella aceite equie bee bene enu riti nu uri'iyeca beella bee bene ze'e.

Xa unga chenu unguti Juan Bautista

(Mt. 14:1-12; Lc. 9:7-9)

¹⁴Chequie ubene' arre Herodes nú chiquí' rñi bee bene lu cuenda' Jesuse, catse bee luhuare ze'e. Nu uni Herodes:

—Pia nú Juan Bautista uhuañi zeca nee, enze'e rlu'culla poder nú rri'illa bee milagro scua.

¹⁵Pero textcua'a bee bene rñi:

—Neca nucua' profeta Elías.
Nu textcua'a bee bene rñi:

—Neca nucua' tucu bee profeta hua'tu.

¹⁶Chenu ubene' arre Herodes nucua' unilla:

—Juan Bautista nucua' li'á unibiya'a nú uru'u lluca equiella nu uhuañi zecalla nee.

¹⁷Uni Herodes scua xne unibiya'lla nú ulluna Juan nu uyaca'cuulla cuna cadena nu uyu'ulla ni'cu' equie cuenda' Herodías una'a Felipe bichi Herodes. Pero uyucu Herodes una'a Felipe bichilla. ¹⁸Nu unilá Juan lu Herodes:

—La neca nze'ca nú yuculu una'a bichilu.

¹⁹Chequie chiquí' uhuana arquí' Herodías Juan, nu niarquí'nchu nú útinchu li'illa pero leca modoe.

²⁰Xne nediya' Herodes nú neca Juan tucu bene enu neli rri'i tucu nú necane cuna nú necalla tucu bene enu nehuañi nze'ca lu Diose, enze'e ulliqui Herodes Juan. Nu né zelalla nú ri'i Herodías lunú niarquí'nchu lu Juan, nu añinzuca nú chiquí' riu' arquí'lla lunú rñi Juan pero la ri'illa beya' xa ri'illa.

²¹Pero chenu uriña bichia nú uyu'u modo nú niarquí' Herodías nú ri'inchu, unga nucua' chenu ullu'cu arre Herodes lana, chequie uri'i arre Herodes tucu eliñi'lla nu udete'lla nú udacu bee bene enu rñibiya' cuna bee bene enu rñibiya' lubee sundado, cuna beelá bee bene enu neca equie lubee bene Galilea. ²²Che uyu'u xinchiu'cu Herodías elu reca eliñi ze'e nu chu uye'enchu. Chiquí' uyu' arquí' Herodes cuna bee bene enu nezene' ze'e nú xa

uye'enchu nu uni arre Herodes ze'e lunchu:

—Una'cu' tatse lunú niarquí'lu lua, nu li'á liquine.

²³Chequie uquie'e arre Herodes diose'lla nú dete'lla lunchu lunú nacu'nchu mase arli'ti lunú rnibiya'lla lu. ²⁴Nu chu uchiu'unchu eli'ya' nu unidichia'nchu lu na'nchu Herodías nú uninchu:

—¿Xi nacua lu arre quie'?

Che uni na'nchu Herodías:

—Una'cu' lluca equie Juan Bautista.

²⁵Nu yexetsia uyu'u zecanchu elu nzucu arre Herodes nu uninchu lulla:

—Niarquia nú nee inza liqui'lu lu tucu pliatu lluca equie Juan Bautista.

²⁶Che chiqui' nehuana utsu arquí' arre Herodes. Pero lu nú uquie'elalla diose'lla lu ye bee bene enu nezene' ze'e, leca' modo nú acaalla lunú unacu'nchu. ²⁷Chequie unibiya' arre Herodes lu tucu sundado nú ye'tayui lluca equie Juan Bautista. ²⁸Nu chu nza sundado ze'e liñi ni'cu' nu uchiecu'i lluca equie Juan uricu'i lu tucu pliatu nu unguya'i nu udete'i yanchu nu chu udete'nchue ya na'nchu Herodías.

²⁹Chequie chenu ubene' bee bene enu uyaquie Juan nucua', uya beei uya tucu beei cuerpo' Juan nu ucachi' beei cuerpo'lla liñi tucu eluhua.

Udete' Jesuse nú udacu ayu' mili bee bene

(Mt. 14:13-21; Lc. 9:10-17; Jn. 6:1-14)

³⁰Cheelá chenu ubenchila' chi'chiucu bee bene' Jesuse,

udixiule'e beella lunu lu ye nú uri'i beella cuna nú uzete' beella bee bene. ³¹Nu uni Jesuse lubee bene'nu:

—Uteehua, ne cha'ahua tucu luhuaire elu lecati nu' para nú tsulachia'ahua ze'e lle'na.

Uninu scua xne huaxi bee bene rriña lunu nu xiu'u beei nziue beei hasta nú né llu'cha acununu bee bene'nu. ³²Che uyu'u Jesuse cuna bee bene'nu liñi tucu barco nu nzuebeella tucu luhuaire elu lecalí ti nu'. ³³Pero ulañi' huaxi bee bene nú uchiu'u barco' beella nza nu uyu'ulu bee bene cua' li'ibeella. Che uchiu'u ye bee bene eyeche ze'e nu nzue e'ya tsia beei nu uriña rlutia'la beei elu riña Jesuse cuna bee bene'nu. ³⁴Chenu ulaca Jesuse liñi barco ze'e ulañi'nu nú nucua'ala huaxi bee bene ze'e. Chiqui' uhua'a arquí'nu li'ibeei xne neca beei xi neca bee sanchi enu lecati ri'i ucu nu uquixienu nú uzete'nu li'ibeei huaxi bee bedichia'. ³⁵Chenu unga uchee, uyabica bee bene' Jesuse lunu nu uni beella:

—Ucheela nee, nu leca ni'tucu ni' bee bene ca'a. ³⁶Uni'i lubee benecua' nú yue beei lubee ranchu cuna lubee eyeche axu ca'a, para nú tsii beei lle'na nú acubeei.

³⁷Pero uni Jesuse lubee bene'nu:

—Li'ihua de'tehua nú acu bee bene quie'

Che uni bee bene'nu lunu:

—¿Pero xie' che tsia'hua chiucu ayu'u dimi denario pá, acu bee bene quie' la?

³⁸Chequie uni Jesuse lubeella:

—¿Xala pá rlu'cuhua? Uya bi'yahua xala pá nu'.

Chenu uri'i beella beya' nú xala pá nu' uni beella lunu:

—Nu' ayu' pá cuna chiucu bela.

³⁹Che unibiya' Jesuse nú cua'a bee bene ze'e texcua'a texcua'a beei lu ixi xata niye'e ze'e.

⁴⁰Chequie ucua'a tucu ayua tucu ayua beei luhware ze'e nu ucua'a se cincuenta se cincuenta beei.

⁴¹Nu una'tse Jesuse ayu' pá ze'e cuna rucu bela ze'e nu ubi'yanu enza liñibe nu udete'nu che'tsala lu Diose, nu chu ule'enu ayu' pá ze'e cuna rucu bela ze'e udete'nu ya bee bene'nu para nú ritsi' beella bee pá cua' cuna bee bela lu ye bee bene ze'e. ⁴²Udacu ye bee benecua' hasta nú ubela' beei. ⁴³Nu urichesca' beella chi'chiucu llume bee pedaso bee pá cuna bee pedaso bee bela enu uya'na lunú udacu beei. ⁴⁴Leta ye bee bene enu udacu ze'e nucua'a ayu' mili bee niyu.

Utsee Jesuse lu inzatu'

(Mt. 14:22-27; Jn. 6:16-21)

⁴⁵Chequie unibiya' Jesuse nú uyu'u bee bene'nu liñi barco para nú chu chue beella stucu chú inzatu' elu nchiucu' eyeche nú lee Betsaida. Pero uya'nasca'nu ze'e para nú ninu lubee bene enu nucua'a ze'e nú nzanu. ⁴⁶Chenu ulaxu nú uninu lubee bene ze'e nú nzanu, che chu nzanu tucu dañi nu unacu'nu lu Diose ze'e. ⁴⁷Pero chenu uyu'u rula', nzusca' Jesuse dañi ze'e. Nu nzala barco' bee bene'nu labe inzatu', ⁴⁸chenu ulañi'nu nú chiqui' neriña' tsenuu bee bene'nu barco' beella xne reca bii enza lubeella. Che uchiu'unu ellicabe ze'e nu utsenu lu inzatu'

ze'e, nu uri'inu tucu nú nze detenu lubeella. ⁴⁹Pero chenu ulañi' bee bene'nu nú seenu nze'tanu lu inzatu' ze'e, uri'i beella elliebacu' nú necanu tucu arma' bene unguti nu urixialibeella. ⁵⁰Xne ulañi' ye beella li'inu nu ulliqui beella, pero chu uninu lubeella:

—iUtsu naaqui archi'hua li'á nucua' la lliquihua!

⁵¹Che uyu'u Jesuse liñi barco' beella nu chu ungaxee bii. Chiqui' uyanu archi' bee bene'nu nucua'.

⁵²Xne ni'lá ri'i beella elliebacu' equie milagro nú uri'inu chenu uritsi'nu bee pá lubee bene lunú nacu'sca' nchiñi elliebacu' beella.

Uri'iyeca Jesuse bee bene enu riti eyeche Genesaret

(Mt. 14:34-36)

⁵³Chequie udete beella stucu chú inzatu' ze'e nu uriña beella lu iliu Genezaret nu ullica'cuu beella barco' beella ru'u inzatu' ze'e. ⁵⁴Hora chenu uchiu'u beella liñi barco' beella uyu'ulu bee bene Jesuse. ⁵⁵Che uya bee bene ze'e nu udixiule'e beei lubee bene diqui bee luhware enza ze'e, nu uquixie bee bene uyayu bee bene, bene enu riti nchiucu' lu camiya elu riene' beei nú nzu Jesuse. ⁵⁶Catse elu uya Jesuse sianu necane bee eyeche lla'na urre necane bee eyeche llene urre necane bee ranchu udixiu bee bene cua' bee bene enu riti elu udete Jesuse. Chequie uziquie bee bene enu riti ze'e lunu nú zelanu nú ti'yabeei masia ru'u xucunu; nu ye bee bene enu uti'ya ru'u xucu Jesuse uyeca' bee bene ze'e.

Lunú rri'i nú rri'i bee bene dula

(Mt. 15:1-20)

7 Tucu bichia uyabica bee fariseo cuna bee ulaxcuela enu reca ley' Moisés lu Jesuse, nze'ta bee benequie' enza Jerusalén. ²Chequie chenu ulañi' bee benecua' nu nu' chiucu chuna bee bene' Jesuse enu ne naa chenu udacu beella tucu nú neca costumbre' bee ulaxcuela cua', che uze'ta bee benecua' bee bene' Jesuse. ³(Xne nzequie bee fariseo cuna bee bene Israel costumbre' bee bene' beei enu udetela, nú la acu beei tunu la naa beei ya beei huaxi bese. ⁴Le'ca chenu ubenchila' beei nú uya beei ru'u i'ya la acu beei tunu la naa beei ya beei, tucu nú neca costumbre' beei. Le'ca nzequie beei huaxilá bee costumbre' beei, nú xa rquiee beei bee vaso cuna bee situ cuna bee exquiñia nú necache' icu' cuna luna nú ra'tse beei.) ⁵Enze'e unidichia' bee fariseo cuna bee ulaxcuela enu reca ley' Moisés lu Jesuse nú unibeei:

—¿Xinu la chequiee bee bene'lu tucu nú neca bee costumbre' bee benea'ahua enu udetela, xinu la naa bee bene'lu yabeei chenu racu beei tucu nú riala nú ri'i beei?

⁶Chequie ucuaqui Jesuse lubee benecua' nú uninu:

—Rri'ihua tucu nú rlube'hua nú rri'i nze'cahua, pero lia rri'ihua nucua'. Neli neca nú uni profeta Isafas chenu uquie'ella lunú uni Diose lu cuenda'hua nú uninu:

Bee benequie' rri'i beei tucu nú chiqui' rlu'cu beei ula'na lua, pero istu nzu arqui'beei lua.

⁷Lecaxi zibi' nú rnibeei nú rlu'cu beei ula'na lua, xne sete' beei bee bene tucu nú necatsia elliebacu' bee bene.

⁸Li'ihua sana' arqui'hua Stichia' Diose para nú nzequiehua bee costumbre'tsia' bee bene nú xa rquiehua bee situ cuna bee vaso cuna beelá nú neca xi neca bee nucua'.

⁹Le'ca uni Jesuse lubeei:

—Sana' arqui'hua Stichia' Diose para nú sucu'tsiahua nú neca bee costumbre'hua. ¹⁰Nu uni Moisés: “Lu'cu bee bene ula'na lu pa'lla cuna lu na'lla”, nu “Bee bene enu ri'ña nú zeca pa' cuna nú zeca na' ati bene ze'e che.” ¹¹Pero li'ihua rnihua nú nu' modo ni tucu bene lu pa'lla cuna lu na'lla: “Leca modo nú ri'á elietsa luhua, xne ye lunú rluca neca nucua' Corbán” (rni bedichia' Corbán nú necala nucua' cuenda' Diose). ¹²Che rnihua nú bee bene enu rni scua la qui'ña nú ri'i nze'e elietsa lu pa' nze'e cuna lu na' nze'e. ¹³Scua neca nú la zucu'hua Stichia' Diose, xne nzequiehua bee costumbre'hua nu sete'hua bee sa'hua nu rri'ihua huaxilá beenú neca scua.

¹⁴Che ubixia Jesuse bee bene, nu uninu lubeei:

—Uquie'e diacahua nu uri'ihua beya' lunú rnia: ¹⁵La ri'i bee bene dula equie cuenda' nú racu bee bene, pero rri'i bee bene dula lunú xiu'u ru'u bee bene, cuna lunú rri'i bee bene, nucua' neca nú rri'i nú rlu'cu bee bene dula. ¹⁶Tatse bee bene enu niarqui' nú yene' nú rnia, quie'e diaca nze'e nucua' che.

¹⁷Chenu utsa'na Jesuse bee bene ze'e nu uyu'unu liñi tucu ni'i nu

unidichia' bee bene'nu lunu nú xa neca lunú uzete'nu scua. ¹⁸Che uninu lubeella:

—¿Xie' le'ca nuuhua ne ri'ihua beya' lunú unia scua la? ¿Xie' la ri'ihua beya' nú la ri'i bee bene dula equie cuenda' nú racu bee bene, ¹⁹xne lunú racu bee bene la chu'u nucua' liñi arqui' bee bene riu'utsia nucua' xla'cu bee bene nu chu xiu'u zecae?

Scua udixiule'enu nú ye bee elubacu la ri'i bee nucua' nú rlu'cu bee bene dula. ²⁰Le'ca uni Jesuse lubei:

—Lunú xiu'u ru'u bee bene cuna lunú rri'i bee bene, nucua' neca nú rri'i nú rri'i bee bene dula. ²¹Xne liñi arqui' bee bene rliñi nú necha nchiñi elliebacu' bee bene nú rri'i bee bene eluhuexe cuna nú rri'i bee bene eluhuana' cuna nú ruuti sa'a bee bene, ²²cuna nú rlu'cu niyu stucu una'a urre rlu'cu una'a stucu niyu, cuna nú rle' bee bene lu'culla stene' sa'alla, cuna nú rri'i bee bene nú necha neca, cuna nú sequienu bee bene sa'a bee bene, cuna nú rlu'cu bee bene bee vicio, cuna nu riea arqui' bee bene lu sa'a bee bene, cuna nú rni bee bene eluquichia', cuna nú ruti' bee bene, cuna nú rri'i bee bene beenú la zibi'. ²³Ye beenú necha neca cua' nze'ta liñi arqui' bee bene nu rri'i bee nucua' nú rri'i bee bene dula.

Xa utsu tenelí arqui' tucu una'a enu la neca bene Israel Jesuse

(Mt. 15:21-28)

²⁴Chenu uchiu'u Jesuse ze'e nú nzanu lu iliu Tiro cuna lu iliu Sidón, che uyu'unu liñi tucu ni'i

xne la niarquí'nu nú acabiya' bee bene nú nzucunu ze'e, pero ne aca nú acachi'lunu ze'e. ²⁵Xne luego chu ubene' tucu una'a nú nzucunu ze'e nu uyanchu elu nzucunu, xne rlu'cunchu tucu xinchiu'cunchu enu nchiñi benechiqui' arqui' nu chu utsu lliquinchu lunu. ²⁶La neca una'a quie bene Israel, necanchu bene Sirofenicia. nu uziquienchu lu Jesuse para nú huanu benechiqui' arqui' xinchiu'cunchu. ²⁷Pero uni Jesuse lu una'a ze'e:

—Uzela nú acuxu bee endu' xne la neca nze'ca nú axi bene pá ru'u bee endu' dete' bene acu bee nicu.

²⁸Che uninchu lunu:

—Neli'lu nú unilu scua. Pero hasta bee nicu racu pá ubee nú sana' ru'u endu' liñi mexa.

²⁹Chequie uni Jesuse lunchu:

—Uni nze'calu nú unilu scua, uquia'a ni'lu uchiu'ula benechiqui' arqui' xinchiu'culu nee.

³⁰Chenu uriñanchu ni'inchu ulañi'nchu xinchiu'cunchu nuxu lu luna, pero uchiu'ula benechiqui' arqui'nchu che.

Chenu uri'iyeca Jesuse tucu bene enu lacalí ni nu nenguata'

³¹Che uchiu'u zeca Jesuse lu iliu Tiro nu udetenu eyeche Sidón cuna bee eyeche lu iliu Decápolis nu uriñanu ru'u inzatu' Galilea. ³²Ze'e uriñayuu bee bene tucu niyu enu nenguata' lunu cuna nú la ni nze'cai nu unacu' bee bene ze'e lunu nú ricu'nu yanu equiei. ³³Chequie unguya' Jesuse niyu ze'e tucu chú, nu udu'nu cuene yanu liñi rucu diacai nu uti'nu xenenu lu lu'chii. ³⁴Che ubi'yanu enza liñibe nu utsii arqui'nu nú uninu:

—¡Efata! —rni bedichia' quie':
 ¡Uya'la! ³⁵Hora ze'e, uya'la rucu
 diaca niyu ze'e nu uye'ca' lu'chii nu
 uquixie uni nze'cai. ³⁶Nu unibiya'
 Jesuse nú la ixiule'e bee bene ze'e
 lu ni' tucu bee bene lunú unga ze'e,
 pero añinzuca nú unibiya' Jesuse
 nú la ni bee bene nucua' a'la mase
 uni bee bene nucua'. ³⁷Chiqui'
 uyanu arqui' bee bene ze'e, nu
 unibeei:

—Ñia neca lu ye nú rri'inu hasta
 nú rri'inu nú uye'e diaca bene enu
 nenguata' nu rri'inu nú rni bene
 enu la aca nii.

**Chenu udete' Jesuse nú udacu tacu
 mili bee bene**

(Mt. 15:32-39)

8 Tucu bichia uyetesa' zeca
 huaxi bee bene lu Jesuse
 nu lecaxi lu'cu beei acu beei, che
 ubixia Jesuse bee bene'nu nu uninu
 lubeella:

²—Ru'u arquia bee benequie',
 xne nucua'a labeei chuna bichia
 cuna li'á nu lecaxi lu'cu beei ca'a
 acu beei. ³Tunu xe'laa beei nú yue
 beei enza ni' beei nu la acu beei nu'
 modo nú chiula' beei lu inziu xne
 nu' beei enu nze'ta enza istu.

⁴Chequie ucuaqui bee bene'nu nu
 uni beella lunu:

—¿Cá chiu'u nú acu bee benequie'
 ca'a luhuare elu lecalí ti nu'?

⁵Che unidichia' Jesuse lubeella
 nú uninu:

—¿Xala pá rlu'cuhua?

Nu ucuaqui beella:

—Rlucuru achine.

⁶Chequie unibiya' Jesuse nú cua'a
 bee bene ze'e lu yuu nu una'tsenu
 achi pá ze'e, nu udete'nu che'tsalá

lu Diose equie cuenda' pá cua', nu
 chu udete'nue ya bee bene'nu para
 nú ritsi' beellae lubee bene ze'e.
⁷Le'ca rlu'cu bee bene'nu lle'na
 bee bela nu udete'nu che'tsalá lu
 Diose equie cuenda' bela ze'e, nu
 unibiya'nu nú ritsi' bee bene'nu
 bee bela cua' lubee bene ze'e. ⁸Ye
 bee bene ze'e udacu beei hasta nú
 ubela' beei nu uzucu sobrasca' achi
 llume bee pedaso nú uya'na udacu
 beei. ⁹Neca tucu tacu mili bee bene
 enu udacu ze'e nu chu uni Jesuse
 lubee bene ze'e nú nzanu. ¹⁰Che
 chu uyu'u Jesuse liñi barco cuna
 bee bene'nu nu nzuebeella lu iliu
 Dalmanuta.

**Unacu' bee fariseo tucu milagro lu
 Jesuse**

(Mt. 16:1-4; Lc. 12:54-56)

¹¹Ze'e uriña bee fariseo nu
 uquixie beei rnixuu beei cuna
 Jesuse, para nú ri'i beei preo li'inu,
 che unacu'beei nú ri'inu tucu
 milagro nú lube' nú nze'tanu lu
 cuenda' Diose. ¹²Nu hasta aquíé
 utsii arqui' Jesuse nú uninu:

—¿Xi nú niarquihua nú ri'á tucu
 milagro? Neli nia luhua nú la ri'á ni'
 tucu milagro luhua.

¹³Chequie utsa'nanu bee bene ze'e
 nu uyu'u zecanu liñi barco cuna
 bee bene'nu nu chu nzuebeella
 stucu chú inzatu'.

**Rri'i nú sete' bee fariseo tucu nú rri'i
 levadura**

(Mt. 16:5-12)

¹⁴Uzañi' bee bene' Jesuse a uya'
 beella nú acu beella nuya'tsia
 beella tucu pá liñi barco ze'e. ¹⁵Che
 uni Jesuse lubeella:

—Ubi'yahua li'ihua, lu levadura' bee fariseo cuna levadura' Herodes.

¹⁶Nu uquixie beella uni beella lusa'beella:

—Uninu scua xne la lu'cua'ahua pá.

¹⁷Pero uri'i Jesuse beya' lunú rni beella, nu uninu lubeella:

—¿Xi nú rnhua nú la lu'cuhua pá? ¿Xie' lasca'lí ri'ihua beya' la? ¿Xie' ni' teme' la ri'ihua beya' la?

¹⁸Nzucu i'culuhua pero pianu la lañi'hua, nzucu diacahua pero pianu la yene'hua ¿Xie' la llucu' arqui'hua, ¹⁹chenu uritsia ayu' pá lu ayu' mili bee bene la? ¿Nu xala llume lunú uzucu sobra uquiete'sa'hua?

Nu ucuaqui beella:

—Chi'chiucune.

²⁰Che uni Jesuse lubeella:

—Chenu uritsia achi pá lu tacu mili bee bene, ¿xala llume uri'ichehua lunú uquiete'sa'hua?

Nu ucuaqui beella:

—Achi llumene.

²¹Chequie uninu lubeella:

—¿Xie' lasca' ri'ihua beya' nee la?

**Uri'iyeca Jesuse tucu
bene enu niquie'lu**

²²Chenu uriña beella eyeche Betsaida, uriñayu bee bene tucu niyu enu niquie'lu lu Jesuse, nu uziquie bee bene ze'e lunu nú ti'nu yanu lu niyu ze'e. ²³Che una'tse Jesuse ya niyu ze'e nu unguya'nu li'i ru'u eyeche ze'e. Nu uti'nu xenenu i'cului, nu uricu'nu yanu equiei nu unidichia'nu lui tunu ri'yalaí lle'na.

²⁴Nu uquixie nú ri'ya, niyu ze'e nu uni:

—Rlaña bee bene nú sebeeí. Pero rnaa beei xi rnaa aca.

²⁵Chequie uti' zeca Jesuse yanu i'cului, nu uninu lui nú bi'yai tucutsia luhuare nu uquixie nú ulañi' nze'ca'i yeene. ²⁶Che uni Jesuse lu niyu ze'e nú yai enza ni'i, nu unibiya'nu nú la chu'i eyeche ze'e cuna nú la ixiule'i lu ni' tucu bee bene nú xa uyeca i'cului.

**Uni Pedro nú neca Jesuse Cristo enu
uxe'la Diose**

(Mt. 16:13-20; Lc. 9:18-21)

²⁷Lu lá bee nucua', nza Jesuse cuna bee bene'nu lubeeyeche lu iliu Cesarea de Filipo. Chenu nzuebeella lu inziu, unidichia' Jesuse lubeeyeche'nu nú uninu:

—¿Ti rni bee bene nú necaa?

²⁸Chequie ucuaqui beella nú uni beella:

—Nu' bee bene enu rni nú necalu Juan Bautista, nu nu' bee bene enu rni nú necalu profeta Elías, nu nu' bee bene enu rni nú necalu tucu bee profeta hua'tu.

²⁹Che uninu lubeella:

—Li'i quiehua, ¿ti rnhua nú necaa?

Nu ucuaqui Pedro nú unilla:

—Li'ilu necalu Cristo enu uxe'la Diose.

³⁰Pero unibiya' Jesuse nú la ni beella nú ti necanu lu ni' tucu bee bene

**Udixiule'e Jesuse nú úti bee bene
li'ínu**

(Mt. 16:21-28; Lc. 9:22-27)

³¹Chequie uquixienú udixiule'enu lubeeyeche'nu nú uninu:

—Li'á Bene enu uxe'la Diose chiqui' nze'ta nú nehuana zecaa, cuna nú la yu' arqui' bee usticia' bee bene Israel li'á, ni'bee ule'ya enu rnibiya' lu beelá bee ule'ya ni'bee ulaxcuela enu reca ley' Moisés, úti bee benecua' li'á, pero bichia rriuna huañi zecaa.

³²Chiqui' neli udixiule'e nze'canu lubeella lu cuenda' nucua'. Chequie unguya' Pedro li'inu tucu chu ze'e nu unilla lunu nú la nia'nu scua.

³³Che ubelleta Jesuse nu ubi'yanu lubee bene'nu, nu uqui'ya' Pedro uri'inu, nú uninu lulla:

—iUlluna' lua beze'lu! Xne elliebacu' nú rri'ilu scua la ye'ta nucua' lu Diose, rri'i tsialu elliebacu' tucu nú neca elliebacu' bee bene iliulabe.

³⁴Chequie ubixia Jesuse bee bene'nu cuna beelá bee bene enu nucua'a ze'e, nu uninu lubeei:

—Tunu nu' bee bene enu niarqui' nú aca benea, la ri'illa tucu nú necatsia elliebacu'lla, rqui'ña nú riqui'lla beenú nehuana zecalla che chu ye'ta quieella li'á. ³⁵Xne bee bene enu niarqui' másela lunú nehuani lu iliulabe quie' enta bichia nú nitilu nucua', pero bee bene enu ati equie nú neca beei benea cuna equie nú uzucu'beei nú rni Stichia' Diose, lu'cu nze'e nú huañi nze'e lu Diose. ³⁶Lecaxi zibi' nú ri'i bee bene ana ye lunú nu' lu iliulabe, tunu unitilulla lu Diose. ³⁷Xne leca modo, nú tsi bee bene nú huañilla liñibe. ³⁸Tunu tu' tucu bene li'á cuna nú rni stichia'a lubee bene enu rlu'cu dula, cuna nú la chequiee beei inziu' Diose le'ca Li'á Bene enu uxe'la Diose tua bee benecua'

chenu riña zecaa cuna lunú rnibiya' Pa liñibe cuna bee ángele'nu.

9 Le'ca uni Jesuse lubee bene ze'e nú uninu:

—Ixiule'a luhua nú nu'hua enu nucua'a ca'a lá atisca' hasta nú lañi'hua poder' Diose cuna lu ye nú recanu.

Ulube' Jesuse ellie'e nú rlu'cunu lu chuna bee bene'nu

(Mt. 17:1-13; Lc. 9:28-36)

²Chenu udete xu'cu bichia, che unguya' Jesuse Pedro, cuna Jacobo cuna Juan. Equie tucu dañi llene, ze'e uche'e nú rnaa Jesuse lubeella.

³Nu chiqui' uyu'ullie'e xucunu nu unga niquichia'quie'e nu lecati aca quie' laquie nú niquichiu scua lu iliulabequie'. ⁴Hora ze'e ulañi' beella nú rdichia'nu Jesuse, Elías cuna Moisés enu uhuañi hua'tu.

⁵Nu uni Pedro lu Jesuse:

—Maestro, ineca nze'ca nú nellua'hua ca'a! Para nú reche'eru chuna ranchu: tucue para li'ilu, nu stucue para Moisés, nu stucue para Elías.

⁶Uni Pedro scua xne chiqui' xiqui beella, nu la ri'illa beya' xi unilla.

⁷Hora ze'e, ulaca tucu xcabe nú udu' xca'lla' equie beella. Nu liñi xcabe ze'e, ubene' beella tucu chi nu uni chi ze'e:

—Neca nucua' lli'ña enu chiqui' se'caa, uzu'cu'hua lunú rninu.

⁸Che ubi'ya beella diqui abenchila' ze'e, nu leca' tinu' ze'e stucu li'tsia Jesuse nzu ze'e.

⁹Chenu enta laca beella dañi ze'e, uni Jesuse lubeella nú la ixiule'e beella lu ni'tucu bee bene lunú ulañi' beella ze'e, hasta bichia nú

huañi zeca Li'á Bene enu uxe'la Diose.

¹⁰Chequie li'itsia beella nediya' beella nucua', añinzuca nú rnidichia' beella lu sa'a beella xa neca equie nú huañi zecanu. ¹¹Nu unidichia' beella lu Jesuse nú unibeella:

—¿Xi nú rni bee ulaxcuela enu reca ley' Moisés nú enta rluti Elías?

¹²Che ucuaquinu lubeella:

—Neli nú nze'ta rluti Elías, para nú tsúche'ella yeene. ¿Nu xinu rni lu ichi' Stichia' Diose nú chiqui' nehuana zeca li'inu enu uxe'la Diose cuna nú nibee bene nú lecati necanu? ¹³Pero nia luhua nú ube'tala Elías, nu uri'i bee bene ye nú niarquibeei lulla, tucu nú niquie lu ichi' Stichia' Diose nú zecalla.

Uhua Jesuse benechiqui' arquí' tucu endu' niyu

(Mt. 17:14-21; Lc. 9:37-43)

¹⁴Chequie chenu ubenchila' beella elu nucua'a beelá bee bene' Jesuse, ulañi' beella nú nucua'a huaxi bee bene ze'e, cuna bee bene'nu nu rni xuu chiucu chuna bee ulaxcuela enu reca ley' Moisés lubee bene'nu ze'e. ¹⁵Chenu ulañi' bee bene ze'e nú nze'ta Jesuse, chiqui' uyanu arquibeei nu xexu'u beei uya ni'beei malune lunu. ¹⁶Che unidichia' Jesuse lubee bene'nu nú uninu:

—¿Xi rdichia'nuhua bee benecua'?

¹⁷Nu ucuaqui tucu bene leta bee bene enu nucua'a ze'e nú unilla:

—Maestro, ca'a nzelayua endua lulu, xne secái ichia' benechiqui' nu rri'i benechiqui' nu la nii. ¹⁸Catse elu nzu endua, si'qui benechiqui' li'i

lu yuu nu xiu'u lliña ru'i, cuna nú tu'na racu xa'layai cuna nú xungai. Unia lubee bene'lu nú huabeella benechiqui' arquí' endua pero né aca beella.

¹⁹Chequie ucuaqui Jesuse nú uninu:

—iChiqui' nziti arquí'hua nu la chili arquí'hua li'á! ¿Se xala tiembu rqui'ña nú tsunua li'ihua? ¿Nu xa riquilá cuna li'ihua? Uteyuhua endu' cua' ca'a.

²⁰Che uriñayu bee bene endu' ze'e lu Jesuse. Pero chenu ulañi' benechiqui' Jesuse, uri'i benechiqui' tucu ichia ziña lu endu' ze'e, nu uzana'i lu yuu nu nzendulai nu xiu'u lliña ru'i. ²¹Chequie unidichia' Jesuse lu pa' endu' ze'e:

—¿Hasta xunga seca endu'lu scua?

Nu ucuaqui pa' endu' ze'e:

—Hasta chenu lle'nai secái scua.

²²Huaxi bese utsi'qui benechiqui' endua luquii cuna lu inza, para nú atii. Enze'e tunu nu' modo nú acalu uri'i elietsa luru, nu uhua'a arquí' li'iru.

²³Che uni Jesuse:

—¿Xinú rnilu tunu acaa? iYeene acane para bee bene enu chili arquí' li'á!

²⁴Chequie urixiali pa' endu' ze'e nú unilla:

—Chili arquia li'ilu. iUri'i elietsa lua para nú chililá arquia li'ilu!

²⁵Chenu ulañi' Jesuse nú riete'sa'lá huaxi bee bene ze'e, che uqui'ya' benechiqui' ze'e uri'inu, nu uninu lui:

—Benechiqui' enu rri'i nú la nii bene cuna nú rri'i nú nenguata' bene, nibiya'a nú chiu'ulu arquí' endu' quie' nu la benchila'lu stucu bese arquí'i.

²⁶Chequie ubixialí benechiqui' ze'e, nu uri'i ichia ziñia lu endu' ze'e. Nu chu uchiu'i arqui' endu' ze'e, utsa'nai endu' ze'e xi neca tucu bene enu unguti, che uni bee bene nú ungutilla endu' cua' nee. ²⁷Pero chu una'tse Jesuse ya endu' ze'e, nu uletsanui nu chu utsulii.

²⁸Che uyu'u Jesuse cuna bee bene'nu liñi ni'i, nu unidichia' beella lunu:

—¿Xinu né acarú ahuaru benechiqui' arqui' endu' cua'?

²⁹Nu ucuauqui Jesuse lubeella:
—Para nú chiu'u clasia' benechiqui' cua' rqui'ña nú dete'hua bichia nú la acuhua nu nacu'hua lu Diose.

**Udixiule'e Jesuse bese rruca nú úti
bee bene li'ínu**

(Mt. 17:22-23; Lc. 9:43-45)

³⁰Chenu uchiu'u beella ze'e, ude te beella lu iliu Galilea. Pero la niarqui' Jesuse nú acabiya' bee bene nú ude te beella enza ze'e, ³¹xne rixiule'etsianu lubee bene'nu nú uninu lubeella:

—Li'á Bene enu uxe'la Diose dete' cuenda bee bene li'á lubee bene, para nú úti beei li'á, pero acatsia bichia rriuna huañi zecaa.

³²Lá ri'i bee bene'nu beya' lunú uninu scua, nu ulliqui beella a nacu' dichia' beella lunu.

**Udixiule'e Jesuse nú ti mase neca
equie**

(Mt. 18:1-5; Lc. 9:46-48)

³³Chenu uriña beella Capernaum. Uriña beella tucu ni'i, che unedichia' Jesuse lubee bene'nu:

—Xi rdichia'hua chenu nzela'ahua lu inziu.

³⁴Pero ne cuaqui beella, xne chenu enta beella lu inziu unibeella lu sa'a beella nú taa beella enu máse neca equie. ³⁵Chequie uzucu Jesuse, nu ubixianu chi'chiucu bee bene'nu nu uninu lubeella:

—Tunu nu'ta tucuhua enu niarqui' nú aca neca equie letahua, rqui'ña nú aca nze'e tucu bene enu lecati neca cuna nú zibi' nze'e lu yehua.

³⁶Nu chu una'tsenu tucu endu' utsunu labe beella, nu uchi'chinu endu' ze'e nu uninu lubeella:

³⁷—Tatse bee bene enu ri'i elietsa lu tucu endu' equie cuenda' li'á, neca xi neca nú rri'i nze'e elietsa lua, nu la ri'illa elietsa lu li'itsia, le'ca rri'illa elietsa lu li'ínu enu uxe'la li'á.

**Bene enu la ni cundra lia'ahua nze'e
nzu chu'ahua**

(Mt. 10:42; Lc. 9:49-50)

³⁸Che uni Juan lu Jesuse:
—Maestro, ulañi'ru tucu bene rlua benechiqui' arqui' tucu bene equie nú recalú, pero ucaru nú ri'illa scua xne la acalla bene leta'ahua.

³⁹Chequie ucuauquinu nú uninu:
—La cáhua nucua', xne bene enu rri'i milagro equie nú reca la ze'ta nze'e li'á.

⁴⁰Bene enu lani condra lia'ahua, nzu nze'e chua'ahua. ⁴¹Tatse bee bene enu liqui' masia tucu basu inza luhua lunú necahua bene' Cristo, neli nia luhua nú yucu bene ze'e lunú dete' Diose lulla.

**Ubi'yahua li'ihua para nú la
zana'hua lu dula**

(Mt. 18:6-9; Lc. 17:1-2)

⁴²Tatse bene enu ri'i nú ri'i tucu bene dula enu apenatsia nzeli arqui' li'á, máse neca nze'ca lu cuenda' bene ze'e nú quie'e bene tucu quiee

molino añilla nu tsi'qui bee bene li'illa lu inzatu'. ⁴³Tunu rri'i yalu nú rri'ilu dula, mejora uchie'cu'e, máse neca nze'ca nú chu'ulu liñibe cuna tucutsia yalu, tunu chu'ulu ebila cuna rucu yalu, elu leca modo nú yala quii. ⁴⁴Ze'e la ati bee berecu', cuna nú leca xunga yala quii ze'e. ⁴⁵Tunu rri'i cuchiu'lu nú rri'ilu dula, mejora uchie'cu'e xne máse neca nze'ca nú chu'ulu liñibe cuna tucutsia cuchiu'lu, tunu chu'ulu ebila cuna rucu cuchiu'lu elu leca modo nú yala quii. ⁴⁶Elu la ati bee berecu' nu leca xunga yala quii ze'e. ⁴⁷Le'ca tunu rri'i i'cululu nú rri'ilu dula, mejora uhuane, xne máse neca nze'ca nú chu'lu liñibe cuna tucutsia i'cu'lulu, nú chu'ulu ebila cuna rucu i'cu'lulu, ⁴⁸elu la ati bee berecu' nu leca xunga yala quii ze'e. ⁴⁹Tucu nú sibi' zete nú riu'e equie elubacu le'ca esquie sibi' nú nehuana zeca bee bene enu nzeli arquí' li'á. ⁵⁰Zete neca nze'cae; pero tunu niti nú neri'i, ¿xa ri'ihua para nú aca zecae tucu nú necane para nú zibi'i? Uri'ihua tucu nú neli neca para nú la zecahua xi neca zete nú la zibi', nu uhuañi nze'cahua cuna bee sa'hua.

Udixiule'e Jesuse nú la le'e niyu una'lla nu la le'e una'a niyu'lla

(Mt. 19:1-12; Lc. 16:18)

10 Che uchiu'u Jesuse Capernaum nu uyanu lu iliu Judea cuna stucu chú re'cu Jordán. Ze'e uyetesa' zeca huaxi bee bene lunu, nu uquixienu sete'nu li'ibeei tucu nú neca costumbre'nu nú rri'inu. ²Che uyabica chiucu chuna bee fariseo lu Jesuse, para nú ri'i

beeí preo li'inu, nu unidichia' beeí lunu tunu nu' modo le'e tucu niyu una'i.

³Chequie ucuaqui Jesuse nú uninu lubeei:

—¿Xa unibiya' Moisés nú ri'ihua?

⁴Nu unibeei lunu:

—Uni Moisés nú nu' modo le'e tucu niyu una'i tunu acache' tucu ichi' elu rni nú ule'e sa'beeí.

⁵Che uni Jesuse lubeei:

—Uni Moisés nú acane scua xne chiqui' nziti arquí'hua. ⁶Pero chenu uquixie Diose ureche' yeene, “ureche'nu niyu cuna una'a”. ⁷“Enze'e chenu uyucu niyu tucu una'a tsa'nai pa'i cuna na'i, para nú huañii cuna una'tsiai. ⁸Che rucu beeí aca beeí xi neca tucutsia bene.” Scua la neca beeí xi neca chiucu bene necatsia beeí tucu bene.

⁹Enze'e la qui'ña nú le'e bene lunú uri'i Diose nú uyetesa'.

¹⁰Chenu uyu'u beella liñi tucu ni'i, unidichia' zeca bee bene! Jesuse lunu equie nú uninu scua lubeec fariseo. ¹¹Nu uni Jesuse lubeella:

—Tatse niyu enu le'e una'a nu yucui stucu una'a, rri'i dula.

¹²Le'ca esquie tunu le'e tucu una'a niyunchu nu yucunchu stucu niyu, rri'inchu dula.

Chenu uri'ile'ya Jesuse bee endu'

(Mt. 19:13-15; Lc. 18:15-17)

¹³Uyayu bee bene bee endu' lu Jesuse, para nú ricu'nu yanu equie bee endu', pero uqui'ya' bee bene enu ube'tayu bee endu' ze'e uri'i bee bene'nu. ¹⁴Chenu ulañi' Jesuse nucua', uleenu nu uninu:

—Utsana'hua nú ye'ta bee endu' lua, nu la cáhua nú ye'ta beeí lua,

xne lunú rnibiya' Diose neca para bee bene enu neca xi neca bee endu' quie'. ¹⁵Ixiule'a luhua tunu la chili arqui' bene lunú rnibiya' Diose xi nzeli arqui' tucu endu, la chu'u bene cua' lunú rnibiya' Diose.

¹⁶Che uchi'chinu bee endu' ze'e, nu uricu'nu yanu equie beei nu uri'ile'yanu li'ibeei.

Ubedichia'nu Jesuse tucu bene xene

(Mt. 19:16-30; Lc. 18:18-30)

¹⁷Chenu uchiu'u Jesuse nú nzanu, uriña xu'u tucu niyu lunu, nu utsulliqui lunu nu unidichia'i:

—Maestro enu neca bene nze'ca, ¿xi rqui'ña ri'á para nú lu'cua elunehuañi nú leca xunga laxu liñibe?

¹⁸Chequie ucuaqui Jesuse nú uninu:

—¿Xinu rnilu nú neca bene nze'ca? Leca ni'tucu bene nze'ca tucutsia Diose neca bene nze'ca.

¹⁹Nediya'la'lu bee mandamiento: “La útilu bene, nu la lu'culu stucu una'a, la ri'ilu eluhuaña, la ta'lu eluquichia' bene, nu la zequienúlu bene, lu'culu ula'na lu pa'lu cuna lu na'lu.”

²⁰Che ucuaqui niyu ze'e nú uni:

—Maestro, ye bee nucua' sucua hasta chenu neca endu'.

²¹Chequie ubi'ya Jesuse lu niyu ze'e nu uzecanu, nu uninu lui:

—Pero rri'itsia tucu nú ri'ilu nee, uquia tuti ye beenú rlu'culu nu dete'lu dimi cua' lubee bene enu seca elitsi. Nu scua lu'culu eluxene liñibe. Nu chu ye'talu cuna li'á mase ulle'calu lunú ulle'calu.

²²Chenu ubene' niyu ze'e nucua', chiqui' utsu nehuana arqui'i nziai,

xne necai tucu bene enu chiqui' xene.

²³Che ubi'ya Jesuse luye bee bene ze'e, nu uninu lubee bene'nu:

—iChiqui' neriña' nú chu'u bee bene xene lunú rnibiya' Diose!

²⁴Chiqui' uyanu arqui' bee bene'nu nu uninu scua, pero uni zecanu lubeella stucu bese nú uninu:

—Bee lliana'a, itucu bene enu mase nchiñi arqui' lubee eluxene', chiqui' neriña' nú chu'ulla lunú rnibiya' Diose! ²⁵La aca neriña' nú dete tucu camello tucu i'chiu' eche dicu, luquela nú chu'u tucu bene xene lunú rnibiya' Diose.

²⁶Pero chenu ubene' bee bene'nu nucua', masescalá uyanu arqui'beella, nu unidichia' beella lu sa'beella:

—¿Ti ri'i Diose perdona, che?

²⁷Chequie ubi'ya Jesuse lubeella nu uninu lubeella:

—Para bee bene neriña' neca nucua', pero para Diose la neriña' neca nucua', xne yeene recanu rri'inu.

²⁸Che uni Pedro lu Jesuse nú unilla:

—Utsa'naru ye nú rlu'curu, para nú nzela quieeru li'ilu.

²⁹Nu ucuaqui Jesuse nú uninu:

—Ixiule'a luhua nú tatse bene enu tsa'na ni'i, urre bichilla, urre zanalla, urre pa'lla, urre na'lla, urre niyu'lla, urre una'lla, urre bee endu'lla, urre bee yu'lla, equie cuenda' li'á cuna equie cuenda' bedichia' nze'ca' Diose, ³⁰yucu bene ze'e lu iliulabe quie' tucu ayu'u bese mase lunú utsa'nalalla, tunu necane ni'lla, urre bichilla,

urre zanalla, urre na'lla, urre bee endu'lla, urre bee yu'lla, añinzuca nú tsi'lla lunú zecalla, pero yuculla bee nucua' nu lu'culla elunehuañi nú leca xunga laxu liñibe. ³¹Pero huaxi bee bene enu chiqui' neca equie nee, aca bee nze'e enu lecati neca, nu bee bene enu lecati neca, aca bee nze'e enu chiqui' aca neca equie.

**Udixiule'e Jesuse bese rriuna nú úti
bee bene li'ínu**

(Mt. 20:17-19; Lc. 18:31-34)

³²Chenu nzuebeella enza Jerusalén, nzuculu Jesuse lubee bene'nu. Nu chiqui' nzenu arquí'beella, nú nzanu Jerusalén, pero beelá bee bene enu nzequie li'ínu, chiqui' xiqui beella. Che ubixia Jesuse chi'chiucu bee bene'tsianu, nu udixiule'enu lubeella lunú zecanu. ³³Nu uninu lubeella:

—Nediya'hua nú nza'ahua enza Jerusalén nee, ze'e li'á Bene enu uxe'la Diose dete' cuenda bee bene li'á lubee ule'ya enu rnibiya' lu beelá bee ule'ya, cuna lubee ulaxcuela enu reca ley' Moisés nu nibiya' bee benequie' nú atia, cuna nú dete' cuenda bee bene cua' li'á lubee bene enu la neca bee bene Israel. ³⁴Che lli'chinu bee bene li'á, cuna nú zete'che' beei li'á, cuna nú tsuxene beei lua, cuna nú úti beei li'á, pero acatsia bichia rriuna huañi zecaa.

**Unacu' Jacobo cuna Juan tucu faura
lu Jesuse**

(Mt. 20:20-28)

³⁵Chequie uyabica Jacobo cuna Juan lu Jesuse, neca beella lliana' Zebedeo, nu unibeella lu Jesuse:

—Maestro, niarquí'ru nú ri'ilu tucu faura nú nacu'ru lulu.

³⁶Nu ucuaqui Jesuse lubeella:

—¿Xi niarquí'hua nú ri'á luhua?

³⁷Nu uni beella:

—Niarquí'ru nú liqui'lu nú zucu tucuru cue'tselu chubee cuna nú zucu stucuru cue'tselu chubeca chenu quixie nú nibiya'lu.

³⁸Pero ucuaqui Jesuse lubeella:

—La ri'ihua beya' lunú rnacu'hua.

¿Xie' riqui'hua nehuana zecahua tucu nú nehuana zeca la? ¿Nu xie' zelahua atihua tucu nú atia la?

³⁹Nu ucuaqui beella lunu:

—Riqui'ru nucua'.

Che uninu lubeella:

—Neli nú nehuana zecahua tucu nú nehuana zecaa nu atihua tucu nú atia. ⁴⁰Pero lunú ti zucu cue'tsea chúbee cuna cue'tsea chúbeca la lu'cua cuendaa nú liquia nucua' luhua, xne necatsia nucua' para bee bene enu rialane.

⁴¹Chenu ubene' se xi'i bee bene'nu nucua', ulee beella lu Jacobo cuna lu Juan. ⁴²Che ubixia Jesuse li'ibeella, nu uninu lubeella:

—Nediya'hua nú bee bene enu rnibiya' lu iliulabe rnibiya' beei tucu nú niarquí'tsia beei, nu bee bene enu chiqui' neca equie scua rri'i beei lubee bene tucu nú niarquí'tsia beei, equie nú rnibiya' beei. ⁴³Pero letahua la yala nú acane scua. Enu niarquí' nú nibiya' luhua, rqui'ña nú zibi' nze'e lu yehua. ⁴⁴Tatsehua enu niarquí' nú mase aca neca equie letahua, rqui'ña nú aca nze'e xi neca muso' lu yehua. ⁴⁵Xne ni' li'á Bene enu uxe'la Diose né yela para nú zibi' bee bene lua, ubela para nú zibia'a

lubee bene cuna nú atia para nú
ixiua stula huaxi bee bene.

**Uri'yeca Jesuse tucu bene enu lee
Bartimeo**

(Mt. 20:29-34; Lc. 18:35-43)

⁴⁶Chequie uriña Jesuse cuna
bee bene'nu eyeche Jericó. Chenu
nzechiu'u beella eyeche cua', cuna
huaxilá bee bene, che nzucu tucu
niyu enu niquie'lu ru'u inziu ze'e
rnacu'i carida nu Bartimeo leei,
necai lliana' tucu bene enu lee
Timeo. ⁴⁷Chenu ubene'i nú axula
enta Jesuse bene eyeche Nazaret,
uquixiei urixialii nú uni:

—iJesuse enu neca lliana' David,
uhua'a arqui' li'á!

⁴⁸Huaxi bee bene rri'i nú rqui'ya'i
para nú zacai, pero a'la mase
rixialii nú uni:

—iLliana' David, uhua'a arqui' li'á!

⁴⁹Chequie utsuxe Jesuse, nu
uninu lubeella:

—Ubixiahua benecua' nú ye'talla.

Che ubixia beella niyu enu
niquie'e lu ze'e, nu unibeella lui:

—Ñia utsu arqui', nu utsuli, xne
rixianu li'ilu nee.

⁵⁰Nu chu utsi'quii llu'chai, rtetsai
uyabicaí lu Jesuse. ⁵¹Chequie
unidichia' Jesuse nú uninu lui:

—¿Xi niarqui'lu nú ri'á lulu?

Nu ucuaqui niyu enu niquie'lu
ze'e nú uni:

—Maestro, niarquía nú ri'ilu nú
ya'la nú bi'ya zecaa.

⁵²Che uni Jesuse lui:

—Nu' modo nú yalu nee, uyeca'la'lu
equie nú utsu tenelí arqui'lu lua.

Hora ze'e uye'e lu niyu enu
niquie'lu ze'e, nu chu nzequieí
Jesuse lu inziu nú nzanu.

Uyu'u Jesuse eyeche Jerusalén

(Mt. 21:1-11; Lc. 19:28-40; Jn. 12:12-19)

11 Chenu nzeriña beella axu
Jerusalén, elu nchiucu' bee
eyeche nú lee Betfagé cuna Betania,
e'ya dañi nú lee Olivos, uxe'la
Jesuse chiucu bene'nu, ²nu uninu
lubeella:

—Uquiahua eyeche axu nú
nchiucu' enza lua'ahua, chenu
riñahua eyeche cua', ze'e nequietu
tucu burro, enu lasca' ricu bee bene.
Uxe'chehuaí nu ye'ta yuhuaí ca'a.
³Tunu nu' enu nedichia' luhua xi nu
xe'chehuaí, uni'hua lu bene ze'e nú
Jesuse enu rnibiya' luru rqui'ñanuí
nu nee chu nzela yuzecaruí.

⁴Chequie nzuebeella, nu ullela'
beella elu nequietu tucu burro ru'u
inziu, axu ru'u puerta' tucu ni'i, nu
chu uxe'che beellaí.

⁵Texcua'a bee bene enu ulañi'
nucua' ze'e unidichia'beeí lubee
bene! Jesuse nu unibeei:

—¿Xi rri'ihua ca'a? ¿Xi nú
xe'chehua burro cua'?

⁶Che ucuaqui beella lubee bene
ze'e tucu nú uni Jesuse lubeella nú
nibeella, esquie uzela bee bene ze'e
nú unguya' beella burro ze'e. ⁷Che
uriñayu beella burro ze'e lu Jesuse.
Nu uricu' beella xucu beellaequieí,
nu chu uricu Jesuse equieí ⁸Le'ca
ucua'a huaxi bee bene xucu beeí lu
inziu elu detenu, nu texcua'a beeí
uchiecu' leca ucua'a beeí lu inziu
elu detenu.

⁹Chequie bee bene enu nzuculu
lunu cuna bee bene enu nze'taqueí
li'ínu, rixiali beeí nú unibeei:

—iChiqui' neca equie nú rri'i
Diose! iChe'tsalá Diose equie

cuenda' li'inu enu nze'ta lu cuenda' Diose! ¹⁰iChe'tsalá Diose equie cuenda' li'inu enu nze'ta nú nibiya', tucu nú unibiya' arre David bene'ahua enu udetela! iChiqui' neca equie nú rri'i Diose li'inu enu nzucu liñibe!

¹¹Che uyu'u Jesuse eyeche Jerusalén nu uyu'unu liñi indu llene Jerusalén. Chenu ulaxu nú ubi'yanu ye nú nu' ze'e chu nzanu eyeche Betania cuna chi'chiucu bee bene'nu, xne ucheela bichia ze'e.

Uni Jesuse nú bichi aca higuera

(Mt. 21:18-19)

¹²Bichia rruclu, chenu nze chiu'u beella eyeche Betania, uquixie nú uliana' Jesuse. ¹³Istu ulañi'nu tucu aca higuera nu nu' leca niye'e lue, nu chu uyabicanu lue tunu ca nu' higo lue acunu, pero leca ndixi lue nu'tsia leca lue, xne la aca tiambu nú rayue. ¹⁴Chequie uni Jesuse lu aca higuera ze'e:

—iLeca' xunga acu bene ndixi nú rayu lulu!

Ubene' bee bene'nu nú uninu scua.

Utiliaca' Jesuse bee bene enu ruti cuna bee bene enu sii labe ele'ya' indu Jerusalén

(Mt. 21:12-17; Lc. 19:45-48; Jn. 2:13-22)

¹⁵Chenu uriña beella eyeche Jerusalén, uyu'u Jesuse ru'u ele'ya' Indu llene Jerusalén nu uquixienuluanu bee bene enu ruti cuna bee bene enu sii ze'e. Nu utelletanu mexa' bee bene enu xi'la dimi cuna nú utsi'quinu xleta' bee bene enu ruti bee paloma ze'e, ¹⁶né zelanu nú achu'u nulá bee bene stene' beei

ru'u ele'ya' indu ze'e. ¹⁷Che uquixie Jesuse nú uzete'nu bee bene, nu uninu lubeei:

—Lu ichi' Stichia' Diose rni: “Nia neca elu chiu'ulee elu nacu' ye bee bene iliulabe lu Diose”; pero li'ihua rri'ihua nia xineca yube' elu rcua'a bee huana'.

¹⁸Chenu ubene' bee ule'ya enu rnibiya' lu beelá bee ule'ya cuna bee ulaxcuela enu reca ley' Moisés nucua', uquixie rla'na beei xa modo útibeei Jesuse xne xiqui beei li'inu lunú rri'inu, xne chiqui' nzenu arqui' ye bee bene lunú sete'nu li'ibeei. ¹⁹Pero chenu nze'ta chu'u rula', uchiu'u Jesuse cuna bee bene'nu eyeche Jerusalén.

Ubichila aca higuera

(Mt. 21:20-22)

²⁰Stucu bichia sila' udete beella elu nzucu aca higuera ze'e, nu ulañi' beella nú ubichi aca ze'e hasta luue.

²¹Chequie ullu'cu arqui' Pedro, nu unilla lu Jesuse:

—Maestro, ubi'yacuru, ubichila aca higuera nú unilu nú bichi.

²²Nu ucuaqui Jesuse nú uninu:

—Uchili arqui'hua Diose. ²³Xne neli nia luhua, nú tatse bene enu ni lu dañi quie': “iUlluna' ca'la nu uzana' lu inzatu'!” tunu la za' arqui'lla chenu nilla scua, aca nú unilla scua che. ²⁴Enze'e nia luhua nú ye nú nacu'hua lu Diose, nu uchili arqui'hua nú liqui'nu nucua' che yucuhuane. ²⁵Chenu rnacu'hua lu Diose, tunu nu' tucu bene enu rleehua lu uri'ihua perdona li'illa, para nú le'ca esquie Diose Pa'ahua enu nzucu liñibe ri'inu perdona li'ihua equie cuenda' stulahua.

²⁶Xne tunu la ri'ihua perdona bee bene, le'ca la ri'i Diose Pa'ahua enu nzucu liñibe perdona li'ihua equie cuenda' stulahua.

Equie nú rnibiya' Jesuse

(Mt. 21:23-27; Lc. 20:1-8)

²⁷Chenu uriña beella eyeche Jerusalén. Diqui nú enzee Jesuse liñi Indu llene Jerusalén, uriña bee ule'ya enu rnibiya' lu beelá bee ule'ya lunu, cuna bee ulaxcuela enu reca ley' Moisés cuna bee usticia' bee bene Israel, ²⁸nu unidichia' beei lunu:

—¿Ti uliqui' elu usticia nú rri'ilu scua? ¿Nu ti uliqui' elu rnibiya' nú rri'ilu scua?

²⁹Che ucuaqui Jesuse nú uninu:

—Le'ca nidichia'a luhua tucu bedichia' tunu cuaquihua nucua', che ixiule'a luhua ti uliqui' elurnibiya' nú rri'á scua. ³⁰¿Ti uxe'la Juan Bautista? ¿Uxe'la Diosella la urre uxe'la bee benella la? Ucuquihua nee.

³¹Che uquixie beei nú ubedichia'nu sa'beei nú unibeei:

—Tunu nia'ahua nu Diose uxe'la Juan Bautista, che ni nucua': “¿Xinu né chili arqui'hua li'illa che?”

³²¿Leca modo nú nia'ahua nú bene uxe'la li'illa?

Unibeei scua xne xiqui beei bee bene, xne ye bee bene nzeli arqui' nú unga Juan tucu profeta enu neli udixiule'e Stichia' Diose. ³³Nu ucuaqui beei lu Jesuse:

—La ri'iru beya' ti uxe'lalla.

Che ucuaqui Jesuse nú uninu lubeei:

—Le'ca la ixiule'a ti uliqui' elurnibiya' nú rri'á scua che.

Ejemplu' bee bene enu lixiu uri'i riña' lu tucu bene

(Mt. 21:33-46; Lc. 20:9-19)

12 Chequie uquixie Jesuse nú uninu puro bee ejemplu lubee bene ze'e. Nu uninu:

—Tucu niyu uquienii bee aca uva lu yu'lla nu udu'lla elu' diqui abenchila'e, nu ureche'ella tucu elu tsi'illa bee uva, nu ureche'ella tucu elu ayaa zucu bene enu ri'i ucu yeene.

'Che udete'lla yuu ze'e lle'la lubee bene, enu ri'i riña' lue, nu chu nzalla enza istu zuculla. ²Chequie chenu uriña tiambu nú aca ula'cu bee uva, uxe'la niyu ze'e tucu moso'lla nze tucu lunú rialalla.

³Pero una'tse bee bene ze'e moso' ze'e, nu udiñi beei li'illa nu uxe'la beei li'illa scuatsia. ⁴Che uxe'la bene enu neca stene' yuu ze'e stucu moso'lla lubee bene ze'e, pero moso' ze'e uti'qui beei cuna nú udiquichi'qui' beei li'illa. ⁵Uxe'lalla stucu moso'lla lubee bene ze'e, pero moso' quie' unguuti beei. Huaxi bee moso' uxe'lalálalla, texcua'a bee moso' quie' uzete'che' beei nu texcua'a beella unguuti beei.

⁶Chequie bene enu neca stene yuu ze'e, rri'itsia nú xe'lalla lliana'lla, enu chiqui' secaalla. Xne uri'illa elliebacu' nú unilla: “Neli nzu arquia nú lu'cu bee benecua' ula'na lu lliana'a.” ⁷Pero uni bee bene ze'e lu sa'beei: “Bene quie' neca enu ya'nanu yuu quie', té utia'ahua li'i, para nú ya'na nua'ahua yuu quie'.” ⁸Che una'tse beei lliana' bene enu neca stene yuu ze'e, nu unguuti beei lliana'lla

nu utsi'qui beei lliana'lla stucu luhware.

⁹Nu unidichia' Jesuse nú uninu:
—¿Xa rri'ihua elliebacu' nú ri'i bene enu neca stene yuu ze'e? Puese nia luhua nú nze'talla nu útilla bee benecua' nu dete'lla yu'lla lu textcua'a bee bene.

¹⁰¿Xie' lasca' ulahua lu ichi' Stichia' Diose elu rni?

Quiee nú uhua u'na bee bene enu rreche'e ni'i,
quiee quie' neca nú mase uzibi' ungache' ni'i ze'e.

¹¹Nucua' neca nú uri'i Diose, nu chiqui' nzenu arqu'ru nucua'.

¹²Chequie chenu ubene' bee bene enu rnibiya' lunú uni Jesuse scua, niarquibeei nú na'tse beei li'inu para nú chánu ni'cu', pero lunú xiqui beei bee bene utsana' beei li'inu nu chu nzuebeei.

Unidichia' bee bene lu cuenda' bee impuesto

(Mt. 22:15-22; Lc. 20:20-26)

¹³Che uxella bee bene, enu rnibiya' ze'e chiucu chuna bee fariseo cuna chiucu chuna bee bene! Herodes lu Jesuse, para nú la'na beei xa modo ninu tucu bedichia' para nú nu' modo ri'i condra beei li'inu. ¹⁴Chenu uriña bee benequie' lu Jesuse unibeei lunu:

—Maestro, nediya'ru nú rnilu nú neli neca, nu la ri'ilu caso nú xa neca bee bene, xne lulu neca tucu necatse bee bene. Nu neli sete'lu bee bene lunú rnibiya' Diose nú xa huañi bee bene. Enze'e rnidichia'ru lulu. ¿Neca nze'ca nú dixiuru impuesto lu arre César la?, urre ¿la

neca nze'cae la? ¿Dixiuru la urre la dixiuru la?

¹⁵Pero uri'i Jesuse beya', lunú lia unitsia beei scua, nu uninu lubeei:
—¿Xi nú rri'ihua preo li'a scua? Uli'quihua tucu melu para nú lañine.

¹⁶Che uriñayuu bee bene ze'e tucu melu lu Jesuse, nu uninu lubeei:

—¿Tiluu nzucu lu melu quie' nu ti lee enu nzucu lue?

Nu ucuaqui beei nú unibeei lunu:
—Lu arre César.

¹⁷Chequie ucuaqui Jesuse nú uninu:

—Ude'te'hua lunú neca cuenda' César lu César, nu ude'te'hua lunú neca cuenda' Diose lu Diose.

Nu chiqui' uyanu arqu'beei chenu ucuaquinu scua.

Chenu unidichia' bene nú huañi zeca bee bene enu unguti

(Mt. 22:23-33; Lc. 20:27-40)

¹⁸Che uya textcua'a bee saduceo lu Jesuse. Xne rnibeei nú la huañi zeca bee bene enu unguti nu unidichia' beei lunu:

¹⁹—Maestro, rni ley' Moisés nú tunu ati tucu niyu nu utsa'nalla una'alla nu né lu'cu beella endu', che yucu bichi tuxie ze'e una'a zaqui ze'e, para nú lu'cu beei endu' enu neca xi neca endu' tuxie ze'e.

²⁰Ucua'a achi bichi bene, bichi rlu beei uyucu una'a, pero ungutilla, nu né lu'cu una'lla endu'. ²¹Chequie uyucu bichi rruca beei una'a zaqui ze'e, pero le'ca esquie ungutilla, nu né lu'cu una'a ze'e endu'lla, le'ca esquie ulle'ca bichi rriuna beei.

²²Scua unga lu achi beei, uyucu

beeí una'a ze'e, pero ni' tucu beeí né lu'cu beeí endu' cuna una'a ze'e, che unguti una'a ze'e. ²³Puese chenu huañi zeca bee bene enu unguti, lu achi bichi beeí, ¿ta beeí neca niyu' una'a cua' xne lu achi bichi beeí uyucu beeí una'a cua'?

²⁴Nu ucuaqui Jesuse lubeeí nú uninu:

—Lixiu nchiñi elliebacu'hua, xne la acahua Stichia' Diose nu la chuluhua xa neca lunú rnibiya' Diose. ²⁵Xne chenu huañi zeca bee bene enu unguti, la yucua' bee bene sa' bee bene nu leca' eluxia ze'e. Acatsia bee bene xi neca bee ángele liñibe. ²⁶Equie nú huañi zeca bee bene enu unguti, ¿xie' lasca' ulahua lu libro' Moisés elu rni nú ulañi'lla tucu aca nú riqui la? Ze'e ubene'lla chii Diose nú uninu: “Li'á neca Diose, lu Abraham, cuna lu Isaac, cuna lu Jacob.” ²⁷iEnze'e nia luhua núla necanu Diose lubee bene enu unguti! Necanu Diose' bee bene enu nehuañi. Xne para li'inu ye bee bene nehuañi. Chiqui' lixiu nchiñi elliebacu'hua.

Mandamiento nú máse neca equie

(Mt. 22:34-40)

²⁸Chenu ubene' tucu bee ulaxcuela enu reca ley' Moisés nú ucuaqui nze'ca Jesuse, lubee benecua' uyabicaí lu Jesuse nu unidichia'i lunu:

—¿Ta mandamiento nú máse neca equie?

²⁹Che ucuaqui Jesuse nú uninu:

—Mandamiento nú máse neca equie rni: “Ubene'hua bee bene Israel, li'inu enu neca Diose'ahua tucutsia necanu. ³⁰Uzeca li'inu

enu neca Diose'lu diquinu' arquí'lu, cuna diquinu' lunú necalu, cuna diquinu' elliebacu'lu cuna diqui nu' juerza'lu.” Ninguie' neca mandamiento nú máse neca equie.

³¹Nu mandamiento rrucu neca: “Zecalu sa'lu tucu nú secalu li'ilu.” Lu rucu bee mandamiento quie', leca stucu mandamiento nú máse neca equie.

³²Chequie ucuaqui ulaxcuela enu reca ley' Moisés ze'e nú uni:

—Maestro, uni nze'calu. Nú unilu scua. Neli nú unilu nú nu' tucutsia Diose, leca' stucu Diose. ³³Nu zeca bee bene li'inu diquinu' arquí'la, cuna diquinu' elliebacu'lla cuna diquinu' juerza'lla, cuna diqui nu' lunú necalla, nu zeca bee bene sa' bene tucu nú secalla li'illa, ninguie' neca nú máse seca lu ye bee u'na nú rdete' bee bene lu Diose.

³⁴Chenu ulañi' Jesuse nú ucuaqui nze'ca ulaxcuela enu reca ley' Moisés uninu lui:

—La nzulu istu para nú chu'ulu lunú rnibiya' Diose.

Che leca' ti alaca arquí' a nacu'dichia'llá lunu.

¿Ti neca bee bene' Cristo enu udetela?

(Mt. 22:41-46; Lc. 20:41-44)

³⁵Chenu sete' Jesuse bee bene liñi indu llene Jerusalén, unidichia'nu lubeeí nú uninu:

—¿Xinu rnibee ulaxcuela enu reca ley' Moisés nú neca Cristo lli'ñi David? ³⁶Nu le'ca li'i David unilla bedichia' quie', tucu nú udete' Espíritu Santo lulla nú unilla:

Diose uni lu li'inu enu rnibiya' lua:

“Uzucu cue'tsea chúbée,
hasta nú ri'á nú nibiya'lu lubee
bene enu rlee lulu.”

³⁷ ¿Enze'e tunu neca Cristo, Ili'ñi
David, xinu rni David li'inu lunu?
Ye bee bene enu nucua'a ze'e ñia
uyu' arqui'bee lunú uninu.

**Uni Jesuse nú necha rri'i bee
ulaxcuela enu reca ley' Moisés**

(Mt. 23:1-36; Lc. 11:37-54; 20:45-47)

³⁸ Chenu uzete' Jesuse bee bene
uninu lubeei:

—Ubi'yahua li'ihua lubee
ulaxcuela enu reca ley' Moisés, xne
riu' arqui'bee nú rutu bee xucu
nze'ca bee, cuna nú riu' arqui'bee
nú lu'cu bee bene ula'na lubeei lu
inziu, ³⁹ nu rla'na bee nú sucu bee
lu xleta nú máse neca equie liñibe
indu, le'ca scua rri'i bee sucu bee
elu máse neca equie chenu nze
tacu bee. ⁴⁰ Le'ca raxi bee ni'i bee
una'a zaqui, rri'ibeei nú xee rnacu'
bee lu Diose, para nú ri'i bee bene
elliebacu' nú neca bee bene nze'ca
pero máse dete' Diose castiya
lubeei.

U'na nú udu'u tucu una'a zaqui

(Lc. 21:1-4)

⁴¹ Tucu bese chenu nzucu Jesuse
liñi indu llene Jerusalén axu elu
nchiucu' bee alcancia elu rdu' bee
bene u'na, ulañi'nu nú rdu' bee
bene u'na liñibe alcancia ze'e. Le'ca
huaxi bee bene xene rdu' bee
huaxi dimi liñibe alcancia ze'e.
⁴² Che uriña tucu una'a zaqui elitsí
ze'e, nu udu'nchu chiucu melu nú
lle'natsia seca liñi tucu bee alcancia
ze'e. ⁴³ Nu chu ubixia Jesuse bee
bene'nu, nu uninu lubeella:

—Neli nia luhua nú u'na nú udu'
una'a zaqui elitsí quie' maselá seca
nucua' lunú udu' beelá bee bene.

⁴⁴ Xne yebee bene rdu'tsia bee
lunú sucu sobra equie dimi'bee,
pero una'a zaqui quie', añinzuca
nú secanchu elitsi udu'nchu ye nú
neca diminchu liñi alcancia ze'e,
nu añinzuca nú nucua'tsia neca nú
rlu'cunchu.

**Udixiule'e Jesuse nú rila indu llene
Jerusalén**

(Mt. 24:1-2; Lc. 21:5-6)

13 Chenu uchiu'u Jesuse liñi
indu llene Jerusalén, che
uni tucu bene'nu lunu:

—iMaestro, ubi'yacuru chiqui' ñia
rnaa bee quiee quie' cuna ni'i llene
quie'!

² Chequie ucuaqui Jesuse nú
uninu:

—Tucu nú rlañi'lu ni'i llene quie',
riña bichia nú la ya'na' ni' stucu
quiee quie' equie sa'e yeene rilae.

Xi seña aca chenu enta laxu iliulabe

(Mt. 24:3-28; Lc. 21:7-24; 17:22-24)

³ Che chu nzuebeella lu tucu dañi
nú lee Olivos nzucu dañi quie' enza
rna lu indu llene Jerusalén, chenu
uzucu Jesuse equie dañi ze'e, che
uyabica Pedro cuna Jacobo cuna
Juan cuna Andrés nu unidichia'
li'itsia beella lunu nú unibeella:

⁴ —Udixiule'e luru, ¿xunga aca
bee nucua'? ¿Nu xa neca bee seña
nú lube' nú nzula nú aca ye bee
nucua'?

⁵ Chequie ucuaqui Jesuse lubeella
nú uninu:

—Ubi'yahua li'ihua, para nú lecati
zequienu li'ihua. ⁶ Xne nze'ta huaxi

bee bene enu ni nú nze'ta beei equie cuenda' li'á nu nibeei luhua: "Li'á neca Cristo"; nu scua zequienu beei huaxi bee bene.

⁷Pero li'ihua chenu yene'hua nú reca xuu urre rni bee bene nú enta nú aca xuu, la lliquihua xne scua nze'ta nú acane, pero la laxusca' iliulabe. ⁸Xne liunu tucu nación cuna stucu nación, nu liunu tucu país cuna stucu país, cuna liunu texcua'a bee bene enu rnibiya', cuna texcua'a bee bene enu rnibiya', nu aca xú cuna nú aca biña huaxi bee luhuare lu iliulabe. Nucua' neca nú apenatsia uquixie lunú enta nehuana zeca bee bene.

⁹Pero ubi'yahua li'ihua xne dete' cuenda bee bene li'ihua lubee usticia, cuna nú zeteche' beei li'ihua liñi bee indu, nu dete' cuenda beei li'ihua lubee gubierno cuna lubee arre equie nú nzeli arquihua li'á, pero scua nu' modo nú nihua lubeei equie cuenda' li'á. ¹⁰Xne rqui'ña nú ixiule'lexu bee bene bedichia' nze'ca' Diose lu ye bee bene iliulabe, ante nú laxu iliulabe. ¹¹Nu chenu dete' cuenda bee bene li'ihua lubee usticia, la chenu arquihua lunú xa nihua, uni'tsiahua bee bedichia' nú liqui' Diose nú nihua xne laca li'ihua enu ni hora ze'e, Espíritu Santo neca enu ni hora ze'e. ¹²Enta bichia chenu dete' cuenda bee bene le'ca bichi beei para nú atilla, nu dete' cuenda bee pa' bee bene endu'lla, le'ca dete' cuenda bee endu' bee pa' beei cuna na'beei para nú atilla. ¹³Ye bee bene iliulabe chana arquí' li'ihua equie nú necahua bee benea; pero bene enu tsuta' arquí'

lua hasta bichia chenu laxu yeene, benequie' tsila'a Diose.

¹⁴Chenu lañi'hua nú nzucu tucu cosa chi'qui' liñi indu llene Jerusalén, tucu nú uni profeta Daniel hasta hua'tu, (bee bene enu rula ichi' quie', uri'ihua beya') nú bee bene enu nucua'a Judea, rqui'ña nú yeca xu'u bee bene ze'e enza dañi. ¹⁵Nu bee bene enu nchiucu' equie ni'i bichia ze'e, la llu'cha' lacalla para nú chu'ulla liñi ni'illa na'tsella stene'lla. ¹⁶Nu bene enu nzu dañi, la benchila'lla ni'lla para nú ye'ta chiya'lla xuculla. ¹⁷iCue'e bee una'a enu nu' endu' xla'cu, cuna bee una'a enu nuu bee endu' enu rachi bichia ze'e! ¹⁸Una'cu'hua lu Diose nú la aca bee nucua' chenu neca tiambu nú nucuaa. ¹⁹Xne chiqui' nehuana zeca bee bene bichia ze'e, hasta chenu ungache' iliulabe lá aca bee nucua' scua, nu leca' xunga acalá bee nucua' scua ni' stucu bese. ²⁰Tunu la tsuxe Diose nú reca bee bichia ze'e, la tsila'a ni' tucu bee bene; pero tsuxe Diose nú reca bee bichia ze'e, equie cuenda' nú secanu bee bene'nu cuna nú ucañinu li'ibeei para li'inu.

²¹Tunu bee bichia ze'e nu' enu ni luhua: "Ubi'yacuruhua ca'a nzucu Cristo", urre "Ni bee nze'e ubi'yacuruhua nguiee nzucu Cristo", la chili arquihua nucua'. ²²Xne nze'ta huaxi bee bene enu ni nú li'ibeei neca beei Cristo, urre nibeei nú li'ibeei neca beei bee profeta' Diose, ri'i beei huaxi bee milagro, cuna huaxilá beenú chenu arquí' bee bene, para nú scua zequienu beei bee bene nu rri'i beei elliebacu'

tunu nu' modo hasta bee bene enu ucañi Diose, zequienu beei.
²³Enze'e nia luhua, nú ubi'yahua li'ihua, xne u dixiule'exulá ye bee nucua' luhua.

**Nze'ta zeca li'inu Bene enu uxe'la
 Diose**

(Mt. 24:29-35, 42-44; Lc. 21:25-36)

²⁴'Pero bee bichia ze'e, chenu udetela nú nehuana ulle'ca bee bene cabelí lu bichia, nu la du'lllea' ellie' guu, ²⁵nu zana' bee belaa enu nchiucu' liñibe lu yuu cuna cuñi ye beenu nchiucu' liñibe. ²⁶Chequie lañi' bee bene iliulabe, Bene enu uxe'la Diose, nú tu'na rulu siqui'nu nze'tanu liñi xcabe cuna ye poder nú rlu'cunu. ²⁷Che xe'lanu bee ángele'nu diqui lu iliulabe para nú quiete'sa' beenu, ye bee bene' Diose catse elu nucua'a beella.

²⁸'Ulu'cuhua cuenda lunú nia luhua, chenu riye' ellutsa lu aca higuera, cuna nú enta ye' leca e'ne' lue, nediya'hua nú enta riñala tsibee che. ²⁹Le'ca scua chenu lañi'hua nú recala ye bee nucua' uri'ihua beya' nú axula nzu lunú nze'ta aca tucu nú unia luhua. ³⁰Ixiule'a luhua nú acaxu ye bee nucua', ante nú ati bee bene enu nehuañi nee. ³¹Iliulabe cuna liñibe nitilu bee nucua' pero stichia'a la dete nú yalu yeene.

³²'Pero lecati ri'i beya' xi bichia nu xi hora nú aca ye bee nucua', nu ni'bee ángele liñibe nu ni' Lli'ñi Diose la ri'i beya' nucua', nediya'tsia Diose Pa liñibe nucua'.

³³'Enze'e nia luhua nú ubi'yahua li'ihua nu utsu tsiñiahua cuna nú una'cuhua lu Diose, xne la ri'ihua

beya' xunga aca bee nucua'. ³⁴Aca nucua' xi neca chenu xiu'u bene tucu biaji. Ante nú chiu'ulla rnilla xi riña' ri'i bee moso'lla. Le'ca unibiya'lla nú tsu tsiña bene enu rriucu ru'u puerta ni'lla. ³⁵Le'ca esquie li'ihua, ucua'a tsiñahua, xne la ri'ihua beya' xunga nu xiura nzelaa, tunu nzelaa chenu nze'ta chu'u rula', urre tunu necane ulela' rula' urre tunu necane ellicabe chenu rixia tiula urre sila'. ³⁶Enze'e ucua'a tsiñahua xne ca tu'natsia riña'a, nu la niarquia nú lluna li'ihua nú la ri'ihua tucu nú riala nú ri'ihua. ³⁷Nu lunú rnia luhua nee, rnia lu ye bee bene: Uhuañihua tucu nú riala nú huañihua, iucua'a tsiñahua para bichia ze'e!

**Ucua'na bee bene enu rlee lu Jesuse
 xa modo na'tse beei li'inu**

(Mt. 26:1-5; Lc. 22:1-2; Jn. 11:45-53)

14 Rri'itsia xiucu bichia nú aca eliñi baxcu, chenu racu bee bene Israel pá nú la chu'u levadura equie, che bee ule'ya enu rnibiya' lubee ule'ya cuna bee ulaxcuela enu reca ley' Moisés, rla'na beei xa modo zequienu beei Jesuse para nú na'tse beei li'inu nu úti beei li'inu. ²Che unibeei:

—Pero la ria'ahua scua diqui nú reca eliñi, para nú la tsu reche bee bene.

**Udu'u tucu una'a perfume equie
 Jesuse**

(Mt. 26:6-13; Jn. 12:1-8)

³Chequie chenu nzu Jesuse eyeche Betania ni'i Simón enu ulle'ca elichia nú lee lepra, chenu nzucu Jesuse lumexa racunu, uriña

tucu una'a nuya' tucu frasco nú
achee nu' perfume nú huaxi secaa,
xne necache'e puro nardo, nu chu
uxa'lanchu frasco ze'e nu udunchu
perfume ze'e equie Jesuse. ⁴Che
bee bene enu nucua'a ze'e ulee beei
nú unibeei lu sa'beei:

—¿Xinu uti'chianchu perfume cua'
scua? ⁵Ala' aiqui perfume cua' tucu
chuna ayu'u dimi denario para nú
ari'inchu elietsa lubee bene enu
seca elitsi, nu uqui'ya' una'a ze'e
uri'i beei.

⁶Pero uni Jesuse lubeei:

—La ri'chiahua li'inchu; ¿xinu
rqui'yanchu rri'ihua? Xne lunú
uri'inchu lua, neca nze'ca nucua'.
⁷Bee bene elitsi siempre nucua'a
cuna li'ihua, nu nu' modo ri'ihua
elietsa lubeei xitse bichia. Pero
li'á la tsua'a cuna li'ihua diqui
tiembu. ⁸Una'a quie' uri'inchu lunú
unganchu, udu'xulanchu perfume
cua' cuerpoa para nú necalane
bichia chenu achi'a. ⁹Ixiule'a luhua,
nú diqui lu iliulabe elu ixiule'e bee
bene bedichia' nze'ca' Diose, le'ca
ni bee bene lunú uri'i una'a quie'
lua para nú ellu'cu' arqui' bee bene
lunú uri'inchu lua.

**Uya de'te' cuenda Judas Jesuse lubee
bene enu niarqui' úti li'inu**

(Mt. 26:14-16; Lc. 22:3-6)

¹⁰Chequie uya Judas Iscariote enu
neca lu chi'chiucu bee bene' Jesuse,
lubee ule'ya enu rnibiya' lubee lá bee
ule'ya para nú dete' cuendai Jesuse
lubeei. ¹¹Chenu ubene' bee ule'ya
ze'e nucua', ñia utsu arqui'beei nu
unibeei nú dete' beei dimi ya Judas,
che uquixie Judas ucua'ana xa modo
dete' cuendai Jesuse lubeei.

Exee nú udacunu Jesuse bee bene'nu

(Mt. 26:17-29; Lc. 22:7-23; Jn.

13:21-30; 1 Co. 11:23-26)

¹²Chequie bichia nú uquixie nú reca
eliñi chenu racu bee bene Israel pá nú
la chu'u levadura equie, chenu le'ca
ruuti bee bene tucu sanchi eliñi baxcu
ze'e che unidichia' bee bene'nu lunu:

—¿Cá niarqui'lu nú nze reche'ru
nú da'cuxe'ahua reché baxcu?

¹³Che uxe'la Jesuse chiucu
bene'nu nu uninu lubeella:

—Uquiahua eyeche Jerusalén, ze'e
lla'cahua tucu niyu enu nuya' tucu
ere'e inza nu chu chequiehua li'illa.

¹⁴Elu chu'u bene ze'e, nihua lu bene
enu neca stene ni'i ze'e: “Singuie
rni Maestro: ¿Ca nzucu cuarto elu
acuxeenua bee benea reché baxcu
quie'?” ¹⁵Che lube' bene ze'e tucu
cuarto elu ayaa nú nzu che'ela liñi,
ze'e reche'hua nú da'cuxe'ahua.

¹⁶Chequie nzuebeella eyeche
llene ze'e, nu ullela' beella tucu nú
uninu lubeella nu ureche'e beella
nú acuxee beella reché baxcu.

¹⁷Chenu uyu'u rula' uriñayuu
Jesuse chi'chiucu bee bene'nu ze'e.

¹⁸Diqui nú nucua'a beella lu mexa
racu beella uni Jesuse lubeella:

—Ixiule'a luhua nú tucuhua enu
racunu li'á dete'cuenda li'á lubee
bene enu uti li'á.

¹⁹Chequie nehuana utsu arqui'beella,
nu unidichia' tucua tucua beella lunu:

—¿Li'á nze'e la?

Nu uni stucu beella:

—¿Li'á nze'e la?

²⁰Nu ucuaqui Jesuse lubeella:

—Tucu lu chi'chiucuhua enu
se'e pá le'ca liñi pliato elu se'a pá
nze'ella.

²¹Neli nú li'á Bene enu uxe'la Diose, zecaa tucu nú rni lu ichi' Stichia' Diose; pero ¿cúe'e bene enu dete' cuenda li'á? Máse neca nze'ca lu cuenda' bene ze'e nú né aláxulla lu iliulabe quie'.

²²Diqui nú racu beella, una'tse Jesuse tucu pá nu udete'nu che'tsa lu Diose nu chu ule'enu pá ze'e udete'nu yabeella nu uninu:

—Udacuhua pá quie', ningúie' neca cuerpoa.

²³Che una'tsenu tucu copa viñu, chenu ulaxu nú udete'nu che'tsa lu Diose, che chu udete'nu vaso cua' ya beella nu ungue' ye beella biñu cua'. ²⁴Nu uninu lubeella:

—Biñu quie' neca renea nú ri'chia chenu atia para nú tsila'a huaxi bee bene, xne equie cuenda' nú atia ya'la tucu inziu cuqui nú lu'cu bee bene nú xa ri'i Diose perdona li'ibeei. ²⁵Ixiule'a luhua nú leca' xunga hue'elá biñu nú necache' uva, hasta bichia nú hua'a biñu cuqui elu rnibiya' Diose.

Uni Jesuse nú ni Pedro nú la chululla li'inu

(Mt. 26:30-35; Lc. 22:31-34; Jn. 13:36-38)

²⁶Chenu ulaxu nú ungula beella tucu canto lu Diose, chu nzuebeella dañi nú lee Olivos. ²⁷Che uni Jesuse lubeella:

—Yehua tsana' arquí'hua li'á rula' quie'; tucu nú nequie lu ichi' Stichia' Diose elu rni: “Utia bene enu rriucu bee sanchi, nu ri'chia letse beel.”

²⁸Pero chenu huañi zecaa rlutia nza'a Galilea, cheela riñahua ze'e.

²⁹Chequie uni Pedro lu Jesuse:

—Añinzuca nú tsana' arquí' ye beella li'ilu, pero li'á la tsana arquia li'ilu.

³⁰Nu ucuaqui Jesuse lu Pedro nú uninu:

—Ixiule'a lulu nú rula' quie' ante nú bixia tiula chiucu bese, unilalu chuna bese nú la chululu li'á.

³¹Pero unila Pedro nú uni:

—Mase atia cuna li'ilu, la cachia nú nu'lua li'ilu.

Le'ca scua uni ye beella.

Uya na'cu' Jesuse lu Diose tucu luhuare elu lee Getsemaní

(Mt. 26:36-46; Lc. 22:39-46)

³²Chenu uriña beella tucu luhuare elu lee Getsemaní uni Jesuse lubee bene'nu:

—Ucua'asca'hua ca'a, nze nacutsia lu Diose.

³³Che unguya'tsianu Pedro cuna Jacobo cuna Juan, nu uquixie nú chiqui' nehuana nzu arquí'nu, hasta nú lixiua' nzu arquí'nu. ³⁴Nu uninu lubeella:

—Chiqui' nehuana nzu arquia, hasta nú se'ca nú atia, uya'nasca'hua ca'a nu la a'tsehua.

³⁵Che chu nza Jesuse lle'na enza lu ze'e, nu utsulliquinu hasta nú uti'nu tequieenu lu yuu, nu unacu'nu lu Diose tunu nu' modo nú la zecanu lunú enta zecanu.

³⁶Chenu rnacu'nu lu Diose uninu:

—Paa, yeene recalú rri'ilu; utsila'a li'á lunú chiqui' juerte enta nú zecaa, pero la acane tucu nú niarquia, urí'itsia tucu nú niarquí'lu.

³⁷Che chu nza Jesuse elu uya'na chuna bene'nu nu ulluna'nu li'ibeella nú ra'tse beella nu uninu lu Pedro:

—Simón, ¿xie' ra'tselu la? ¿Xie' né riquí'lu azucu naalu masia tucu hora la? ³⁸Uzucunahua, nu

una'cuhua lu Diose para nú la ri'i beze'lu ana luhua, xne nu' ana arqui'hua nú ri'ihua nú neca nze'ca, pero la riqui' cuerpo'hua.

³⁹Chequie nza zeca Jesuse, nze nacu'nu lu Diose nu uninu lu Diose tucu nú uninu bese rluu. ⁴⁰Chenu ubenchila' zecanu elu uya'na chuna bene'nu ulluna'nu li'ibeella nú stucua'lla bese ra'tse beella, xne chiqui' riu'u cala' lubeella nu lá ri'i beella beya' xi cuaqui beella lunu. ⁴¹Bese rriuna chenu ubenchila'nu elu nucua'a beella uninu lubeella: —¿Xie' ratsesca'hua nu sulachi sca'hua la? Pero uhuahua cala' cua' luhua, xne li'á Bene enu uxe'lla Diose uriñala hora nú dete' cuenda bene li'á lubee bene enu rri'i dula. ⁴²Uzetehua ne cha'ahua. Nze'ta bicala bene enu dete' cuenda li'á nee.

Chenu una'tse bee bene Jesuse

(Mt. 26:47-56; Lc. 22:47-53; Jn. 18:2-11)

⁴³Rniscallá, Jesuse cuna li'ibeella chenu uriña Judas enu unga tucu lu chi'chiucu bee bene'nu, uriña yui huaxi bee bene enu nzene espada cuna bee acarute. Nú nze'ta na'tse beei Jesuse lunú unibiya' bee ule'ya enu rnibiya' lubee ule'ya cuna bee ulaxcuela enu reca ley' Moisés cuna nú rnibiya' bee usticia' bee bene Israel. ⁴⁴Chequie Judas enu udete' cuenda Jesuse lubee bene ze'e, unilai lubee bene ze'e nú uni lubeella:

—Bene enu acua tucu bichiu' xeca, nze'e na'tsehua nu chiuca uya'hua li'illa. ⁴⁵Nu chenu uriña Judas lu Jesuse uyabicaí lunu nú uni:

—Maestro, Maestro.

Nu chu udacui tucu bichiu' xecanu. ⁴⁶Che una'tse bee bene ze'e Jesuse nu unguya' beei li'inu.

⁴⁷Pero tucu bee bene' Jesuse enu nzu ze'e uhualia espada nu uchiecu'lílla diaca tucu bene enu neca moso' ule'ya enu rnibiya' lu ye bee ule'ya. ⁴⁸Nu uni Jesuse lubee bene ze'e:

—¿Xinu entahua cuna espada cuna acarute para nú na'tsehua li'á xineca tucu huana'? ⁴⁹Ye bichia nzua cuna li'ihua liñi indu llene Jerusalén elu uzetea Stichia' Diose nu né na'tsehua li'á ze'e. Pero scua acane para nú yalu nú rni Stichia' Diose.

⁵⁰Che ye bee bene' Jesuse uyecaxu'u beella nu utsana' arqui'beella li'inu.

⁵¹Chequie nzequie tucu niyu e'ne' Jesuse nu nutui tucutsia sámana. Pero chenu una'tse bee bene ze'e li'i, ⁵²chu uchiu'u xqui' xu'i liñi sámana, nú nutui nu e'cu etui uyecaxu'i nzai.

Uyayu bee bene Jesuse lubee usticia' bee bene Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Che uyayu bee bene ze'e Jesuse lu ule'ya enu rnibiya' lu ye bee ule'ya, nu uyetesá' ye bee ule'ya enu rnibiya' lubee ule'ya, cuna bee usticia' bee bene Israel cuna bee ulaxcuela enu reca ley' Moisés. ⁵⁴Nu istu istu uyaquie Pedro Jesuse hasta ru'u ni'i ule'ya enu rnibiya' luye bee ule'ya, nu chu uzucu Pedro ru'u quii cuna bee bene enu rriucu ru'u ni'i ule'ya ze'e.

⁵⁵Bee ule'ya enu rnibiya' lubee ule'ya cuna ye bee usticia' bee

bene Israel, ucua'na beella xi ricu' quiya beella Jesuse para nú scua nu' modo nú utibeella li'inu. Pero né llela' beella xi aricu' quiya beella li'inu. ⁵⁶Xne añinzuca nú huaxi eluquichia' uricu' quiya beella Jesuse, pero urene uni tucu beella nu urene uni stucu beella. ⁵⁷Chequie utsuli chiucu chuna beella nu uricu' quiya beella tucu eluquichia' Jesuse nu unibeella: ⁵⁸—Li'iru ubene'ru nú uni nucua': Li'á nitilua indu llene Jerusalén nú ureche'e bee bene, nu chunatsia bichia reche'a stucu indu nú lá reche' bee bene.

⁵⁹Pero ni' scua la neca tucu necatse lunú rni beella urene urene uni beella.

⁶⁰Che utsuli ule'ya enu rnibiya' lu ye bee ule'ya labe bee bene enu nucua'a ze'e nu unidichia'lla lu Jesuse:

—¿Xinu la cuaquilflu? ¿Xie' neli neca nú rnibeei lulu scua la?

⁶¹Pero la nili Jesuse nu né cuaquilflu che unidichia' zeca'lla ule'ya ze'e lunu:

—¿Xie' li'ilu necalu Cristo lli'ni Diose liñibe la?

⁶²Che ucuaqui Jesuse nú uninu:

—Li'á nze'e nu lañi'hua li'á Bene enu uxe'la Diose nú nzucua'a cue'tse Diose chúbee li'inu enu chiqui' reca yeene, nu le'ca lañi'hua nú nzela liñi xcabe enza liñibe.

⁶³Chenu ubene' ule'ya ze'e nucua'a, che utsalla xuculla nu unilla:

—¿Xinu la'nala'ahua testigo nee?

⁶⁴Ubene'la'hua nú xa uni nucua'a bedichia' nú necha neca lu Diose; ¿xa nihua nee?

Chequie uni ye bee bene ze'e nú ati Jesuse.

⁶⁵Xiucu xuna beei utsu xene lunu nu utsacu' beei lunu nu udiñi beei li'inu nu unibeei lunu:

—¡Uni'ti udiñi li'ilu!

Che bee sundado enu rriucu indu llene Jerusalén le'ca uxutse beei nda'gu lunu.

Utsacu' arquí' Pedro nú la chululla Jesuse

(Mt. 26:69-75; Lc. 22:56-62; Jn. 18:15-18, 25-27)

⁶⁶Chenu uzucu Pedro ru'u eli'ya' ni'i ule'ya enu rnibiya' luye bee ule'ya, che uriña tucu criada' ule'ya ze'e. ⁶⁷Chenu ulañi'nchu nú nzucu Pedro ru'u quii ze'e ubi'yanchu lulla nu uninchu lulla:

—Le'ca nuulu enzenuulu Jesuse bene eyeche Nazaret.

⁶⁸Pero ucachi' Pedro nú unilla: —La chu'lua benecua', nu la ri'á beya' xi rnilu.

Che uchiu'u Pedro ze'e nu utsulla ru'u puerta nu chu ubixia tiula.

⁶⁹Chenu ulañi' zeca criada ze'e Pedro stucu bese, che uquixienchu nú uninchu lubee bene enu nucua'a ze'e:

—Le'ca nuu nucua' neca nucua' tucu bene' Jesuse.

⁷⁰Pero ucachi' zeca Pedro nú la chululla Jesuse. Che lu ze'e tsia unia'ala bee bene enu nucua'a ze'e lu Pedro:

—Che rlube' nú necalu tucu bene' benecua', xne necalu bene Galilea nu rdichia'lu tucu nú rdichia'bee.

⁷¹Che uquixie Pedro nú utsuta'lla lu stichia'lla nú unilla: Dete' Diose castiya li'á tunu la nia nú neli neca.

—iLa chulua bene enu rnihua!

⁷²Hora ze'e ubixia tiula stucu bese nu ullu'cu arqui' Pedro lunú uni Jesuse lulla: "Ante nú bixia tiula chiucu bese, unilálu chuna bese nú la chululu li'á." Chenu ullu'cu arqui' Pedro nucua' uquixiella nú runa'lla.

Chenu uyayu bee bene Jesuse lu Pilato

(Mt. 27:1-2, 11-14; Lc. 23:1-5; Jn. 18:28-38)

15 Chenu uye'e lu yuu uyetesá' bee ule'ya enu rnibiya' lubee ule'ya cuna bee usticia' bee bene Israel cuna bee ulaxcuela enu reca ley' Moisés cuna bee usticia enu mase rnibiya' ubedichia' beella nú xa ri'i beella. Che ullica'cuu beella Jesuse nu udete' cuenda beella li'inu lu Pilato. ²Che unidichia' Pilato lu Jesuse:

—¿Necalu Arre' bee bene Israel la?

Nu ucuaqui Jesuse nú uninu:

—Li'á nze'e.

³Equie nú huaxi nú rricu'quiya bee ule'ya enu rnibiya' lubee ule'ya li'inu. ⁴Enze'e unidichia' Pilato lu Jesuse stucu bese:

—¿Xinu la cuaquilílu? Ubi'yacuru huaxi nú rni bee bene lu cuenda'lu.

⁵Pero lecaxi ucuaqui Jesuse, che chiqui' uyanu arqui' Pilato.

Unibiya' bee bene nú ati Jesuse

(Mt. 27:15-31; Lc. 23:13-25; Jn. 18:38-19:16)

⁶Cada chenu reca eliñi baxcu, rla'a Pilato tucu bene enu nchiñi ni'cu', tatse enu nacu' bee bene nú la'a. ⁷Bee bichia ze'e nchiñi Barrabás ni'cu' cuna beelá bee bene enu neyete'i, xne unguuti beei bee bene chenu uliunu beei bee bene'

gobierno. ⁸Chenu uyetesá' bee bene para nú nibeei lu Pilato nú ri'lla tucu nú neca costumbre'lla, ⁹che uni Pilato lubeei:

—¿Niarqui'hua nú la'a Arre' bee bene Israel la?

¹⁰Uni Pilato scua xne uri'lla beya' nú equie nú ria arqui' bee ule'ya enu rnibiya' lubee ule'ya, enze'e udete' cuenda beei Jesuse lulla.

¹¹Pero bee ule'ya enu rnibiya' lubee ule'ya udu'beei arqui' bee bene ze'e para nú ni bee bene ze'e lu Pilato nú la'alla Barrabás. ¹²Chequie unidichia' Pilato lubeei:

—¿Xi niarqui'hua nú ri'ina enu rnihua nú neca arre' bee bene Israel?

¹³Nu ucuaqui beei nú urixialibeei:

—iUquie'e nucua'a lu cruse!

¹⁴Nu uni Pilato lubeei:

—Pero ¿ta nú necha neca uri'i nucua'?

Nu masesca'lá juerte ubixialí beei:

—iUquie'e nucua' lu cruse!

¹⁵Chequie lunú niarqui' Pilato nú ya'na nze'calla lubeei, ula'alla Barrabás. Nu unibiya'lla nú uzete'che' bee sundado Jesuse, nu chu udete' cuendalla li'inu lubee sundado para nú quie'e beei li'inu lu cruse.

¹⁶Unguya' bee sundado ze'e Jesuse labe eli'ya' ru'u palacio, elu uyetesá' ye bee sundado. ¹⁷Che ungutu beei tucu laquie morado Jesuse, nu ureche'e beei tucu ellu'ñi' nú necache'e eche uzucu' beei equienu. ¹⁸Nu uquixie beei nú rixiali beei lunu:

—iLa laxua' nú nehuañi Arre' bee bene Israel!

¹⁹Chequie udu'beei tucu ixi' equienu, nu utsu xene beei lunu,

cuna nú utsu lliqui beei lunu, xi neca nú chiqui' rlu'cu beei ula'na lunu. ²⁰Chenu ulaxu nú xitse uri'inu beei li'inu, uhuabeei laquie morado nú nutunu nu ungutu beei nú neca xucunu li'inu, che unguya' beei li'inu para nú quieenu lu cruse.

Uquie'e bee bene Jesuse lu cruse

(Mt. 27:32-44; Lc. 23:26-43; Jn. 19:17-27)

²¹Chequie chenu nzeyu beei Jesuse, ulla'ca beei tucu bene eyeche Cirene enu lee Simón necalla pa' Alejandro cuna Rufo nze'talla enza dañi. Che uri'i bee sundado juerza li'illa para nú uya'lla cruse' Jesuse.

²²Nu chu unguya' beei Jesuse tucu luhuare elu lee Gólgota, nu rni nucua': lluca equie bene nguti. ²³Nu udete' beei biñu nú nucha inza nú nelaa nú lee mirra, para nú hue'nue pero lá hue'nue. ²⁴Chequie uquie'e bee sundado ze'e li'inu lu cruse. Nu urita beei tucu rifa equie cuenda' xucunu bi'ya tane ri'i cada tucua beei ana.

²⁵Rquie quie' sila' uquie'e beei Jesuse lu cruse. ²⁶Equie cruse'nu uquie'e beei tucu letrero nú rixiule'e xi nú uquie'e beei li'inu lu cruse, cuna nú rni lu letrero ze'e nú necanu: "Arre! bee bene Israel."

²⁷Le'ca uquie'e beei chiucu huana' lu tucua cruse, tucu nze'e cue'tsenu chúbee nu stucu nze'e cue'tsenu chubeca. ²⁸Scua uyalu lunú rni lu ichi' Stichia' Diose nú rni: "Ubacu' beei li'inu leta bee bene enu necha rri'i."

²⁹Chequie bee bene enu udete ze'e unibeei huaxi bedichia' nú necha neca lunu, cuna nú rcuñi

beei equie beei xi'chinu beei li'inu nú rnibeei:

—iManú! Rnilu nú chilalu indu llene Jerusalén nu lu chunatsia bichia reche' zecalue, ³⁰utsila'a li'ilu nu ulaca lu cruse cua'.

³¹Le'ca bee ule'ya enu rnibiya' lubee ule'ya cuna bee ulaxcuela enu reca ley Moisés, unibeei huaxi bedichia' nú necha neca lunu nu unibeei:

—Utsila'a nucua' bee bene, pero la aca nucua' tsila'a nucua' li'i nucua'.

³²iTunu neca nucua' Cristo puese láca Cristo enu neca arre' bee bene Israel lu cruse para nú laña'ahua, che chili arquia'ahua nucua'!

Hasta bee huana' enu nequie lu cruse cuna li'inu rnibeei bedichia' nú necha neca lunu.

Chenu unguti Jesuse

(Mt. 27:45-56; Lc. 23:44-49; Jn. 19:28-30)

³³Chenu unga rrebichia ucabeli diqui neca lu iliulabe hasta rquie chuna uche. ³⁴Hora ze'e chenu unga rquie chuna uche juerte urixiali Jesuse nú uninu:

—Eloi, Eloi, ¿lama sabactani? —rni bedichia'cua': Diosea, Diosea, ¿xinu utsana' arqui'lu li'á?

³⁵Chenu ubene' chiucu chuna bee bene enu nucua'a ze'e nucua', che unibeei:

—Uquie'e diacahua rixialla profeta Elías.

³⁶Che uyaxu'u tucu beei nu ucuacha nze'e tucu esponja lu inza vinagre nu uzucu'i lli'i tucu aca nu uti'i esponja cua' ru'u Jesuse para nú hue'nu inza vinagre cua' nu uni:

—Utsana'hua li'illa bi'ya se nze'ta laca Elías li'illa lu cruse.

³⁷Pero juerte urixiali Jesuse nu ungutinu. ³⁸Chequie laquie llene nú neru'cu nzi'qui liñi indu llene Jerusalén, utsa arli'ti'llune hasta aya nu hasta aquí. ³⁹Che capitañi enu rnibiya' lubee sundado ulañi'i nú xa unguti Jesuse lunú nzui ze'e nu uni:

—Neli nú neca benequie' Lli'ñi Diose.

⁴⁰Le'ca istu nucua'a chiucu chuna bee una'a ri'ya, leta bee una'a quie' nzu María Magdalena, cuna Salomé cuna María enu neca na' Jacobo enu ri'chia bene Jacobo enu lle'na, cuna José. ⁴¹Bee una'a quie' uyaquie Jesuse cuna nú uri'i beenchu elietsa lunu chenu nzunu Galilea. Le'ca ze'e nucua'a huaxilá bee una'a enu uyaquie li'inu hasta Jerusalén.

Chenu uhuachi' Jesuse

(Mt. 27:57-61; Lc. 23:50-56; Jn. 19:38-42)

⁴²Bichia nú rri'iluxu bee bene Israel ye nú qui'ña beella neca bichia xee nu sulachi beella. Bichia ze'e chenu enta chu'u rula', ⁴³uriña José bene eyeche Arimatea. Ungalla tucu bee usticia lubee bene Israel, nu rlu'cu bee bene ula'na lulla. Le'ca nzuquiella nú lañi'lla lunú rnibiya' Diose, nu uyu'u valuru'lla unacu'lla cuerpo' Jesuse lu Pilato. ⁴⁴Chequie chiqui' uyanu arqui' Pilato chenu ubene'lla nú ungutilla Jesuse, nu chu ubixialla capitañi para nú ri'lla beya' tunu neli nucua'.

⁴⁵Chenu uni capitañi ze'e nú neli nú ungutilla Jesuse, che uzela Pilato nú unguya' José cuerpo'nu. ⁴⁶Chequie uya José

utsii tucu sabana fiño nu chu ulacalla cuerpo' Jesuse lu cruse nu utelalla sabana ze'e cuerpo'nu nu uya ca'chi'lla cuerpo'nu liñi tucu eluhua elu neda'ñila liñi tucu quiee nu utsacu'lla ru'u eluhua ze'e cuna tucu quiee llene. ⁴⁷María Magdalena cuna María na' José ulañi' beenchu elu uhuachi' cuerpo' Jesuse.

Uhuañi zeca Jesuse nú ungutinu

(Mt. 28:1-10; Lc. 24:1-12; Jn. 20:1-10)

16 Chequie chenu udete bichia nú sulachi bee bene Israel, María Magdalena, cuna Salomé, cuna María na' Jacobo, uya tsi' beenchu perfume para nú du' beenchu perfume cua' cuerpo' Jesuse. ²Nu chenu uye'e lu yuu zila' domingo silatu' uya beenchu ru'u eluhua' Jesuse, chenu enta liñi bichia. ³Chenu nzue beenchu lu inziu uni beenchu lu sa'beenchu: —¿Ti yucu quiee llene nú nacu' ru'u eluhua' Jesuse nee?

⁴Pero chenu ubi'ya beenchu ulañi' beenchu, nu la nacua' quiee llene ze'e ru'u eluhua. ⁵Chenu uyu'u beenchu liñi eluhua ze'e, ulañi' beenchu, nú nzucu tucu niyu e'ne' chubee ru'u eluhua ze'e, nutui tucu laquie niquichi nú stuñi, nu ulliqui beenchu. ⁶Che uni lubeenchu:

—La lliquihua. Nediyaá nú rla'nahua Jesuse bene eyeche Nazaret enu uquiee lu cruse. Pero uhuañi zecanu nú ungutinu. Leca'nu ca'a. Ubi'yacuruhua elu uricu cuerpo'nu. ⁷Nee uquia tixiule'ehua lu Pedro cuna lu beelá bee bene' Jesuse nú rlutinu nzanu Galilea, cheela riñahua ze'e; nu

lañi'hua li'inu ze'e tucu nú uninu luhua.

⁸Chequie yexetsia uchiu'u bee una'a quie' liñi eluhua ze'e, nu reca tse'tse beenchu xiqui beenchu. Nu lecati lu udixiule'e beenchu lunú unga ze'e, equie nú xiqui beenchu.

Ulube'lu Jesuse lu María Magdalena

(Jn. 20:11-18)

⁹Domingo sila' chenu uhuañi zeca Jesuse nú ungutinu, rlutilá ulube'lunu lu María Magdalena enu uhuanu achi benechiqui' arquí'.
¹⁰Che uya tixiule'enchu lubee bene enu uyanzenu Jesuse, nu nehuaana nzu arquí'beella cuna nú runa' beella equie cuenda' li'inu. ¹¹Pero chenu ubene' beella nú nehuañi Jesuse cuna nú ulañi' María Magdalena li'inu, né chili arquí'beella nucua'.

Chenu ulube'lu Jesuse lu chiucu bene'nu

(Lc. 24:13-35)

¹²Lu ze'e lá ulube'lu Jesuse lu chiucu bee bene'nu enu nza enza dañi, pero urene ulube'lunu lubeella. ¹³Che uyatixiule'e bee bene quie' lubeelá bee bene'nu, pero ni' nú uni beella né chili arquí' beelá bee bene'nu.

Lunú unibiya' Jesuse nú ri'i bee bene'nu

(Mt. 28:16-20; Lc. 24:36-49; Jn. 20:19-23)

¹⁴Lu ze'elá ulube'lu Jesuse lu chetu'cu bee bene'nu, chenu

nucua'a beella lu mexa. Uqui'ya' beella uri'inu, xne nziti arquí'beella equie nú la chili arquí'beella lunú unibee bene enu ulañi'la' li'inu nú uhuañi zecanu nú ungutinu.

¹⁵Chequie uninu lubeella:

—Uquiahua diqui lu iliulabe nu udixiule'ehua bedichia' nze'ca' Diose lu ye bee bene. ¹⁶Nu bene enu chili arquí' bedichia' nze'ca' Diose cuna nú rinzalla tsila'a Diose li'illa, pero bene enu la chili arquí' Stichia' Diose la tsila'a Diose li'illa lu castiya'lla. ¹⁷Nu bee seña quie' lu'cu bee bene enu chili arquí' Stichia' Diose. Equie nú lea hua beella bee benechiqui' arquí' bee bene. Le'ca nibeella stucu dialu rene nú la ni beella. ¹⁸Nu tunu na'tse beella be'la cuna yaa beella; nu tunu hue' beella nú nucha veneno, lecaxi zeca beella; nu le'ca chenu ricu' beella ya beella equie bee bene enu riti yeca' bee bene ze'e.

Uquie Jesuse liñibe

(Lc. 24:50-53)

¹⁹Chequie chenu ulaxu nú uni Jesuse lubeella, chu uquieenu liñibe nu uzucunu cue'tse Diose chubee. ²⁰Che uchiu'u beella nú nze tixiule'e beella bedichia' nze'ca' Diose lubee bene diqui bee luhuare. Nu uri'i Jesucristo elietsa lubeella, uri'inu bee milagro para nú ri'i bee bene beya' nú neli neca Stichia' Diose nú sete' beella. Amén.